

ప్రకటన పుస్తకం డాఃజీతిమన్నికెజ్ దేవుణు యోహానుజ్ తోరిస్తికెజ్

నెల్ల కిబిసినిక

ఇక్క బయ్బిల్దు మన్ని కడెవెరి పుస్తకం. తెలుగు బయ్బిలుదు యా పుస్తకం, ప్రకటన ఇజి మనాద్. ప్రకటన ఇని మాటదిజ్ అర్థం డాఃజీతిమన్నికెజ్ వెలి తోరిసినిక, టుకుర్ ఇడ్డిమన్నిక టుకుర్ లాగ్లి తోరిసినిక ఇజి అర్థం మనాద్. ఇక్కెజ్ ఎయెర్బా ముజాల నెస్తిమన్ని మాటెజ్ ఆఉ. యేసుప్రబు వందిజ్ని దేవుణుమాటదిజ్ సాస్యం వెహ్ని వందిజ్, యేసుప్రబు సిసుర్లోఇ ఒరెన్ ఆతి యోహాను ఇనివన్నిజ్ రోమప్రబుత్వం ఆతికారిబు, నారు డిఃబిస్తి పోక్తార్. ఈజియన్ నమ్దరం నడిమిమన్నివత్మోన్ ఇని లోకు సిల్లి ఇజిరి దేసమ్దు పోక్తార్ (ప్రకటన 1:9).

వాండ్రు ఆయ ద్వీపుదు మహివలె, దేవుణు వన్ని దూతవెట యోహానుజ్ తోరిస్తికెజ్ వాండ్రు యా పుస్తకమ్దు రాస్త మనాన్. యేసు క్రీస్తు సిలువాదు సాజి, మర్జి నిజిత్తి వెనుక, ఇంజుముంజు 60 పంటెజ్ డాట్టివెనుక యా పుస్తకం రసె ఆత మనాద్ ఇజి నమ్మిజినార్.

యా పుస్తకం, ఆసియాదు మన్ని ఏడు సజమ్కాజ్ రాస్తి ఉండ్రి ఉత్తమ్లెకెండ్ మనాద్ (ప్రకటన 1:10-11). వాని కలమ్దు ఇనికెజ్ జర్గినెలె ఇని వందిజ్ యా పుస్తకమ్దు రాస్త మనాద్. యేసుప్రబు మర్జి వానివందిజ్, మరి యా లోకమ్దు జర్గిదెజ్ మన్నికెజ్వందిజ్, మరి యా లోకమ్ది ఆక్కర్వందిజ్ యా పుస్తకమ్దు రాస్త మనాద్. డొమినియన్ ఇనికాన్ రోమ రాజు మహివలె యా పుస్తకం రాసె ఆత మనాద్ ఇజి నంఠెండార్ నమ్మిజినార్.

మొదోల్

1 యాక డాఃజితిమహి సజతిజ్ దేవుణు, యేసుక్రీస్తుజ్ సెందితివరిజ్ తోరిస్తెజ్ ఇజి వన్నిజ్ తోరిస్తెకెజ్. వెటనె ఇనికెజ్ జర్గినెలె ఇజి యేసు క్రీస్తు, వన్ని దూతెజ్ వెహ్తా పోక్తాండ్రె, అయ సజతిజ్ వన్ని పణిమణిసి ఆతి యోహానుజ్ తోరిస్తాన్.

2 దేవుణు మాటెజ్ వందిజ్ని, యేసు క్రీస్తు వన్నిజ్ తోరిస్తె విజు వనకాజ్ సుడఃజి నిజమాతికెజ్ ఇజి యోహాన్ సాస్యం వెప్పినాన్.

3 దేవుణుబాణిజ్ వాతి యా ప్రవక్త మాటెజ్, డటం సదివీజి మహివరిజ్ వెన్పిసినికాన్ని, సద్వినికెజ్ వెంజి అయాకెజ్ మన్నుదు ఇడ్డి నమ్మిజి మంజినికాన్ దేవుణు సీజిని దీవెనమ్కు మంజినికాన్ ఆనాన్. ఎందానిజ్ ఇహిజు, అయాకెజ్ అయాలెకెండ్రె జర్గిదెజ్ సమయం డగు ఆత మనాద్.

దేవుణుదిజ్ పోగ్డిఃజి వెప్పిని మాటెజ్.

4 అసియాదు మన్ని ఏడు, దేవుణు సజమ్కాజ్ యోహాను రాసినాన్. ముజాల మహికాన్, ఏలు మన్నికాన్, వాని కాలమ్దు మంజినికాన్ ఆతికాన్, మరి వాండ్రు బస్తిమన్ని వన్ని సింహాసనం ఎద్రుమన్ని ఏడు ఆత్మెజ్, వన్ని దయదార్థం మీ ముస్కు మంజి, మీరు నిపాతిదాన్ మండ్రెజ్ సాయం కిపిన్.

5-6 నమ్మకమాతికాన్ ఆతి సాసి, సాతి వరిబాణిజ్ తొలిత నిజిత్తికాన్, బూమి ముస్కు ఏలుబడిః కిజిని విజు రాజురిజ్ ముస్కు రాజు ఆతి యేసుక్రీస్తుబా వన్ని దయదార్థమ్దాన్ మీరు నిపాతిదాన్ మండ్రెజ్ సాయం కిపిన్. మజి ప్రేమిస్తాండ్రె వన్ని నలదాన్, మా పాపమ్కాజ్ మజి విడుదల కిజి, వన్ని బుబ్బాతి దేవుణుదిజ్ ఉండ్రె రాజ్యం లెకెండ్రెని, వన్నిజ్ పణి కిని పుజేరిజ్ లెకెండ్రె కిత్తిమన్ని యేసుక్రీస్తుజ్ గొప్ప గవరమ్ని ఆతికారం అంతు సిల్లెండ్రె ఎలాకాలం మనీద్. ఆమెన్.

7 ఇదిలో, వాండ్రు మొసాపుదాన్ వాజినాన్! విజేరి కణుకెజ్ వన్నిజ్ సూణెలె. వన్నిజ్ బల్లెమ్దాన్ గుత్తికార్బా సూణార్లె. బూమి ముస్కు

మనికార్ విజేరె, వన్నిజ్ సుడఃజి గుండె కొత్తె ఆజి అడఃబనార్లె. అయాలెకెండెనె ఆనాదలె. ఆమెన్.

8 “అల్పాని ఒమెగ* నానె”, ఇహిజ మొదొల్ని కొస నానె. “ముజాల మహికాన్, ఏలు మన్నికాన్, వాని కాలమ్దు మంజినికాన్ ఆతి విజు దన్నిజ్ సత్తు మన్నికాన్” ఆతిమన్ని ప్రబు ఆతి దేవుణు వెప్పినాన్.

లోకుమరిసి లెకెండ ఒరెన్

9 యేసువందిజ్ వాజిని స్రమెజ లోఇ, వాండ్రు కిని ఏలుబడిఃదుని, వన్ని వందిజ్ కస్టమ్కు ఓరిస్తెజ్, మీవెట కూడఃజి మన్నికాన్ ఆతి, మీ తంబెరి ఆతి యోహాను ఇని నాను, దేవుణు మాట వందిజ్ని యేసువందిజ్ సాస్యం వెప్పి వందిజ్, సమ్దరం నడిఃమి మన్ని పత్మోసు ఇని ద్విపుదు† ఒరెనె మహా.

10-11 వారమ్దిజ్ మొదొహి రోజు ఆతి ప్రబు దినమ్దు, నాను దేవుణు ఆత్మదాన్ నిండితి మహివలె, జోడు బాంగ ఉక్కిలెకెండ ఉండ్రీ కంటం నా వెనుకహాన్ వెహా. నీను సుడఃజినికెజ్ విజు ఉండ్రీ పుస్తకమ్దు రాసి, ఎపెను, స్మూర్న, పెర్గాము, తుయతయర, సర్దిను, పిలదెల్పియ, లవొదికియ ఇని ఏడు, దేవుణు సజమ్కాజ్ పోక్అ ఇజి, అయా కంటం నజీ వెప్తిమన్నిక, నా వెనుకహాన్ నాను వెహా.

12 యాక వెహానె, నావెట వర్గిజిని కంటం ఇనికాదొ ఇజి సుడఃదెజ్, నాను వెనుక మప్తా. నాను వెనుక మప్తిజ్, బజారమ్దాన్ తయార్ కిత్తి ఏడు దీవ డండిజ్ సుడఃత.

13 అయ దీవ డండిజు నడిఃమి, లోకు మరిసి ఆతి వన్నిజ్ పొలితి ఒరెన్ వన్నిజ్ సుడఃత. వాండ్రు వన్ని పాదమ్ దాక అందితి మన్ని ఉండ్రీ నీరి సొక్క పొర్పాజి గుండెదు బజారమ్దాన్ మన్ని కంటువ తొవె ఆత మహాన్.

* 1:8 1:8 అల్ప గ్రీకుబాసది మొదొహి అక్రం. ఒమెగ కడఃవెరి అక్రం † 1:9 1:9 ద్విపుసురుల సమ్దరం మన్ని ఇజిరి దేసెం

14 వన్ని బురాని వన్ని బుర్రది కొప్పు తెల్లాని దూతిదిజ్ పోలిసి, గాంధులెకెండ్ తెలాజ్ మహాద్. వన్ని కణుకెజ్, సిను కొనెజ్లెకెండ్ మహె.

15 వన్ని పాదమ్కు కంసు సొల్లుదు కాప్తి, కంజు మెర్నినిలెకెండ్ మహె. వన్ని కంటం గొప్ప పెరి గడ్డ జాటు లెకెండ్ మహాద్.

16 వాండ్రు వన్ని ఉణెర్ కియుదు ఏడు సుక్కెజ్ అస్త మహాన్. రుండి దరిజ్బా తెవుగు మన్ని కుర్ల లెకెండ్ మన్ని మాటెజ్ వన్ని వెయుదాన్ వెల్లి వాతె. వన్ని మొకొం పూర్తి జాయ్దాన్ మెర్నిని పొద్దుది జాజ్ లెకెండ్ మహాద్.

17 వన్నిజ్ సుడఃతానె, నాను సాతివన్నిలెకెండ్ వన్ని పాదమ్కాజ్ అర్త. అయావలె వాండ్రు వన్ని ఉణెర్ కియు మా ముస్సు ఇడఃజి ఈఘు వెహ్హాన్. “తియెల్ ఆమా. నాను మొదోహికాన్. నాను కడఃవెరిదికాన్.

18 నాను బత్తిజి మంజినికాన్. నాను సాతిమహికాన్ గాని ఇదిలో ఎలాకాలం బత్తిజి. మరి సావుదిని సాతికార్ మంజిని అయా లోకమ్ది తాలంకియు నా కీదు మనాద్.

19 అందెజె, ఏలు మన్ని వనకాజ్ వందిజ్, మరి వాని కాలమ్దు జర్గిదెజ్ మనికెజ్, నీను సుడఃతి మనికెజ్ నీను రాన్అ.

20 నా ఉణెర్ కియుదు నీను సుడఃతి మన్ని ఏడు సుక్కెజ్, ఏడు దేవుణు సజమ్క దూతార్. మరి బజారమ్దాన్ తయార్ కితి మన్ని ఏడు దీవ డండిజ్, ఏడు దేవుణు సజమ్కు.

2

ఎపెను పట్టమ్దు మన్ని దేవుణు సజమ్దిజ్ రాసిని ఉత్రం

1 “ఎపెను పట్టమ్దు మన్ని దేవుణు సజమ్ది దూతెజ్ రాన్అ, వన్ని ఉణెర్ కియుదు ఏడు సుక్కెజ్ అసి, ఏడు దీవడండిజి నడిమి బూలాజినికాన్ వెహ్నిని మాటెజ్ ఇక్కెజ్.

2 నీను కిజిని పణిజ్ని, నీను కస్టబాడఃతికెజ్ నాను నెసిన. నీను ఎస్సానో హిమ్మెజ్ ఓరిస్తిమన్ని ఇజిబా నాను నెసిన. సెఇకెజ్ కినివరిజ్ నీను ఓరిసి మండ్రెజ్ అట్ఇ ఇజి నాను నెసిన. అపొస్తురు ఇజి వెహె

అజి అపొస్తురు ఆఇ వరిజ్ నీను పరిస కిజి, వారు అబద్ధం వెహ్వికార్, ఇజి నీను నెస్తి ఇజి నాను నెసిన.

3 నీను నా పేరు వందిజ్ హిమ్మెజ్ డిస్ఎండ ఓరిస్తి మన్ని మరి కస్టమ్కు బరిస్తిమన్ని గాని నీను దన్ని వందిజ్ ఎసెజ్బా వందితిఇ ఇజిబా నాను నెసిన.

4 అహిజ్బా, మొదోహాన్ నా వందిజ్ నిజి మహి మొదోహి ప్రేమ, నీను డిస్తిసిత్తి ఇజి ఉంత్రి తప్పు నీ ముస్కు సుడత.

5 నా ముస్కు మన్ని ప్రేమ డిసిసీజి, నీను ఎస్సా వెనుక సొన్ని మహి ఇజి నీను ఒడిబిఅ. దన్ని వందిజ్ నీ మన్ను మరిసి, తప్పుజ్ ఒప్పుకోడేజి డిసిసీజి, ముజాల కిజి మహికెజ్ కిజి మన్అ. నీను మన్ను మారిసి, పాపమ్కు ఒప్పుకోడేజి డిసి - సిఎండ మహిజ, నాను నీడగు వాజి, నీ దీవడండిదిజ్ దన్ని బాడ్డిదాన్ లాగు విసీర్చ.

6 గాని, నీవందిజ్ ఉంత్రి నెగ్గి సజతి మనాద్. నాను ఇస్టం కిఇకార్ ఆతి నికొల జటుదివరి పణిజ్ నీనుబా ఇస్టం కిఇతి.

7 దేవుణు ఆత్మ దేవుణు సజమ్కాజ్ వెహ్వికెజ్ ఇనికెజ్ ఇజి గిబ్బిజ్ ఒడేజి వెంజి అయావజ నడిజి మంత్రు. సెఇకెజ ముస్కు గెలిస్సి వన్నిజ్ పరలోకం ఆతి పరదీసుదు మన్ని పాణం సీని మరాతి పట్టు తిండ్రెజ్ అక్కు సీనా.

స్మూర్న పట్నమ్దు మన్ని దేవుణు సజమ్దిజ్ రాసిని ఉత్తం

8 “స్మూర్న పట్నమ్దు మన్ని దేవుణు సజమ్ది దూతెజ్ రాస్అ. మొదోహికాన్ని కడెవెరిదికాన్ ఆతి, సాతి వెనుక మర్జి నిజేతికాన్ వెహ్విని మాటెజ్ ఇక్కెజ్.

9 నీ కస్టమ్కు, నీ కరు బత్కు నాను నెసిన. గాని దేవుణుదిజ్ సెందితి సజతిజలోఇ నీను ఆస్తి మన్నికిలెకెండె. మాపు యూదురు ఇజి వెహ్విని దేవుణు లోకుర్ ఆఇకార్ ఆతి, సయ్తానుజ్ సెందితికార్ ఆతి యూదురు, నీవందిజ్ వెహ్వి దూసణ మాటెజ్ నాను నెసిన.

10 నీ ముస్కు వాదెజ్ మన్ని కస్టమ్కాజ్ వందిజ్ నీను తియెల్ ఆమా. నిజి పరిస కిదెజ్, నీ లోకురిజ్ సెగొండారిజ్ సయ్తాను అస్సిసి

జెలిదు ఇడిస్నాన్లె. పది దినమ్కు నీను హిమ్మెజ్ ఒరిసి మండ్రెజ్ వలె. గాని నా ముస్సు మన్ని నమకమ్వందిజ్ సావు వాతిజ్బా నమకమాతికి ఆజి మన్అ. ఎలాకాలం మంజిని బత్తు ఇని ఇనాయం నాను నిజి సీనాలె.

11 దేవుణు ఆత్మ దేవుణు సజమ్కాజ్ వెహ్నికెజ్ ఇనికెజ్ ఇజి గిబ్బిజ్ ఒడ్జి వెంజి, అయావజ నడిసి మండ్రు. సెఇకెజ ముస్సు గెలిస్సి వన్నిజ్ రుండి సావు ఇని దెబ తగ్గివద్.

పెర్గాము పట్టమ్దు మన్ని దేవుణు సజమ్దిజ్ రాసిని ఉత్తం

12 పెర్గాము పట్టమ్దు మన్ని దేవుణు సజమ్ది దూతెజ్ రాస్అ.

“రుండి దరిజ్ తెవుగు మన్ని కుర్దలెకెండ్ మన్ని మాటెజ్ మన్నికాన్ వెహ్నికెజ్ ఇక్కెజ్.

13 సయ్తాను ఏలుబడిః కిజిని పట్టమ్దు నీను బత్తిజిని ఇజి నాను నెసిన. సయ్తాను ఏలుబడిః కిజిని అయ పట్టమ్దు నా ముస్సు నమకం ఇడ్డి నమకమాతి సాసి ఆతి అందిపాయెజ్ సప్తి కాలమ్దుబా నా ముస్సు ఇడ్డి నమకం డిసిసివిండ, నా పేరు వందిజ్ నీను నిజం నిహిమహి ఇజి నాను నెసిన.

14 గాని నజి పడిఃఇకెజ్ సెగం సజతిజ్ నీబాన్ మన్నె. బొమ్మెజి వూజి సిత్తికెజ్ తింజి, రంకు బూలాజి పాపం కిదెజ్ ఇస్రాయేలు లోకురిజ్ రేప్పి మన్నికాన్ ఆతి బాలాకుజ్ * అక్కెజ్ నెస్సిసి మన్నికానాతి బిలాము† బోద లొజిజి నడిసినికార్ నీ లొఇ మనార్.

15 నికొల బోద లొజిజి మన్నికార్బా నీ లొఇ మనార్.

16 అందెజె నీను మన్ను మారిసి పాపమ్కు ఒప్పుకొడెఃజి డిసిసిఅ. సిలిజ నాను బేగి నీడగు వాజి నా వెయుదాన్ వాజిని కుర్ద లెకెండ్ మన్ని మాటెజాణిజ్ వరివెట విదెం కినా.

* **2:14 2:14** ఇస్రాయేలు లోకురి ముస్సు సయెవ్ సీదెజ్ ఇజి బిలాము ఇని ఒరెన్ గురు నన్ని ప్రవక్తెజ్ కూక్కి మన్ని మోయాబు దేసెమ్ది రాజు. బుద్ది సిల్లెండ దేవుణుదిజ్ వెత్తెకమాతి పణి కితి వందిజ్ వన్ని వందిజ్ దేవుణు మాటదు రాస్త మనాద్. సంకియా 22-24, యెహోసువ 24:9, నాయాది 11:25. † **2:14 2:14** ఇస్రాయేలు లోకురి ముస్సు సయెవ్ సీదెజ్ ఇజి మోయాబు దేసెమ్ది రాజు బాలాక కూక్కి మని ఒరెన్ గురు నన్ని ప్రవక్త. సంకియా 22-24.

17 దేవుణు ఆత్మ, దేవుణు సజమ్కాజ్ వెహ్నికెజ్ ఇనికెజ్ ఇజి గిబ్నిజ్ ఒడజి వెంజి అయావజ నడిజి మండ్రు. సెఇవనకాజ్ ముస్సు గెలిసినివన్నిజ్ నాను పరలోకమ్దు డాజితి మన్ని మన్న ఇని తిండి సెగం ఉండెజ్ సీనా. మరి, దొహ్క్కికాండ్రె ఆవిండ, మరి ఎయెన్ వన్నిజ్బా నెన్ఇ ఉండ్రె కొత్త పేరు రాస్తా మన్ని ఉండ్రె తెల్లాని పణకుబా సీనా.

తుయతయిర పట్టమ్దుమన్ని దేవుణు సజమ్దిజ్ రాసిని ఉత్తం

18 “తుయతయిర పట్టమ్దు మన్ని దేవుణు సజమ్ది దూతెజ్ రాన్అ కణుకెజ్ సిసుకొనెజ్ లెకెండ మన్ని, మెర్నిని కంజుదిజ్ పోలితి పాదమ్కు మన్ని దేవుణు - మరిసి ఆతి వన్ని మాటెజ్ ఇక్కెజ్.

19 నీను కిజిని పణిజ్ ఎలాగ మర్తికెజ్, నీ ప్రేమ ఎలాగ మర్తిక, నీ నమకం ఎలాగ మర్తిక ఇజి నాను నెసిస. నీను మహివరి వందిజ్ కిజిని పణిజ్ని నీను హిమ్మెజ్ డిన్విండ ఓరిసి మంజినిక విజు నాను నెసిస. నిజమె ముజాల కిజి మహి దన్నిజ్ ఒద్దె నెగెండ నీను ఏలు కిజిని.

20 గాని నజీ నపిఇ ఉండ్రె సజతి నీబాన్ మనాద్. దన్నిజ్ అదినె దేవుణు ప్రవక్త ఇజి వెహ్నిని యెజెబెలు ఇని బోదెలిదిజ్, నీబాన్ మండ్రెజ్ ఒప్పుకొటి ఇజి ఉండ్రె తప్పు నీ ముస్సు వెహ్తాజ్ మనాద్. అది దన్ని బోదదాన్ రంకు బూలాదెజ్ మరి బొమ్మెజు మాడిసి, బొమ్మెజు పూజెజ్ సీత్తికెజ్ తిండ్రెజ్ ఆనాద్ ఇజి నా ముస్సు నమకం ఇడ్డిమన్ని, నా పణికిని వరిజ్ మొసెం కిజి తప్పు సరిదు నడిపిసినాద్.

21 అది రంకు బూలానిక డిసిసీజి, దన్ని మన్ను మారిసి పాపమ్కు ఒప్పుకొడెజి డిసిసీదెజ్ నమయం సీత్త, గాని అది ఒవ్పతాద్.

22 ఇదిలో నాను దన్నిజ్ నిజ్దెజ్ అట్ఇ పెరి కస్టమ్కాజ్ మంసమ్దు తెర్పాలె. దన్నివెట కూడెజి రంకు బూలాతికార్, వారు దన్ని వెట కూడెజి కిత్తిమహి పణిజవందిజ్ ఒడిబిజి, వనకాజ్ ఒప్పుకొడెజి డిసిసీవిండ మహిజ, వరిజ్ నాను నండొ కస్టమ్దు అర్పాలె.

23 దన్ని కొడెరిజ్ నాను సప్ప. అయావలె నాను లోకురి మన్నుజ మన్ని ఆలోసనమ్కుని ఆసెజ్ ఇనికెజ్ ఇజి సుడెజి నెసినికాన్ ఇజి

విజు దేవుణుసజమ్కు నెసినె. నీ లోఇ ఒరెన్ ఒరెన్ వన్నిజ్ వన్నివన్ని పణిదిజ్ తగితి లెకెండ్ నాను సూణా.

24 దన్ని బోదదిజ్ లోజిఇవరిజ్ని మరి సయ్తూనులోఇ డాజీతి మన్ని వనకాజ్ నెస్తెజ్ వరి మన్ను ఇండఃఏండ మంజిని వరిజ్, నాను వెప్పినిక ఇనిక ఇహిజ, మీరు మరి ఇనికబా కిదెజ్ ఇజి వెప్పి, మీ మున్ను మరి ఇని బరు నాను మొవ్వి.

25 గాని నాను వానిదాక మీరు నెస్తిమన్ని వనకాజ్ నెగెండ్ అసి మండ్రు.

26 ఆక్కర్దాక నజీ ఇస్టమాతి వజ కిజి మంజి, సెఇ వనకాజ్ మున్ను గెలిసినివన్నిజ్, దేసమ్క లోకురి ✱మున్ను ఏలుబడిః కిదెజ్ అతికారం సీనా.

27 నా బుబ్బాతి దేవుణుబాణిజ్ నజీ అతికారం దోహ్క్తిమన్నిలెకెండ్, వన్నిజ్ లోకురి మున్ను అతికారం సీనా. దేవుణు మాటదు రాస్తిమన్నిలెకెండ్, “వాండ్రు ఇనుము డుడ్డుదాన్ వరిజ్ ఏలుబడిః కినాన్. కుంబెరి వన్ని కుండెజ్లెకెండ్ వరిజ్ పెడెల్ కొత్నాన్”

28 సెఇ వనకాజ్ మున్ను గెలిస్తి వన్నిజ్, నాను కోడిఃజామ్దు సోని సుక సీనా.

29 దేవుణు ఆత్మ దేవుణు సజమ్కాజ్ వెప్పినికెజ్ ఇనికెజ్ ఇజి గిబ్బిజ్ ఒండఃజి వెంజి అయావజ నడిఃజి మండ్రు.

3

సర్దిసు పట్నమ్దు మన్ని దేవుణు సజమ్దిజ్ రాసిని ఉత్తం.

1 “సర్దిసు పట్నమ్ది దేవుణు సజమ్ది దూతెజ రాస్అ. ఏడు సుక్కెజ్ని దేవుణు ఏడు ఆత్మ మన్నికాన్ వెప్పిని మాటెజ్ ఇక్కెజ్. నీను కిజిని పణిజ్ నాను నెసిన. బత్తిజినికాన్ ఇజి నిజి పేరు మనాద్. గాని నీను సాతికినె.

2 నా దేవుణు ఎదురు నీ పణిజ్ పూర్తి ఆతికెజ్ ఇజి తోర్ఉతె. అందెజె నీను, నిజ్జి తెలి ఆజి, సాదెజ్ డగ్రు ఆతి మన్ని మిగిలిత్తి వనకాజ్ సత్తు కిబిన్అ.

3 అందెజె నీను ముజాల ఇనిక నెస్సి మన్నిదొ, ఎలాగ వెహి మన్నిదొ ఇజి ఎత్తు కిఅ. వనకాజ్ లొజిజి పాపమ్కు ఒప్పుకొండేజి డిసిసిజి, మారు మన్ను పొందిఅ. నీను నిజ్జి తెలి ఆజి మన్ఎండ మహిజ, ఒరెన్ డొజారి వానిలెకెండ నాను వానా. ఇనిక ఇహిజ ఎమేణి గడియారు నాను, నీ డగ్రు వానానొ ఇజి నిజి తెలివిద్.

4 గాని వరి సొక్కెజ్ మొహ్కి ఆఎండ, సుబరం మన్నికార్ సెగొండార్ సర్దిన్ పట్టుమ్దు నీబాన్ మనార్. అందెజె వారు మొహ్కి సిల్లి తెల్లాని సొక్కెజ్ తొడిగిజి, నావెట బూలాదెజ్ తగ్గికార్.

5 సెఇ వనకాజ్ గెలిసినికాన్, వరిలెకెండ తెల్లాని సొక్కెజ్ తొడిగిజి మంజినాన్. దేవుణు వెట ఎలాకాలం బత్తినివరి పేరుకు రాసి ఇండేజిని పుస్తకమ్దాన్ నాను వన్ని పేరు ఎసెజ్బా డెయ్జి పొక్వ. గాని నా బుబ్బ ఎదురుని వన్ని దూతార్ ఎదురు వాండ్రు నజి సెందితికాన్ ఇజి వన్ని పేరు ఒప్పుకొణా.

6 దేవుణు ఆత్మ దేవుణు సజమ్కాజ్ వెహ్నికెజ్ ఇనికెజ్ ఇజి గిబ్బిజ్ ఒండేజి వెంజి అయావజ నడిజి మండ్రు.

పిలదెల్పియ పట్టుమ్దు మన్ని దేవుణు సజమ్దిజ్ రాసిని ఉత్తం.

7 “పిలదెల్పియ పట్టుమ్దు మన్ని దేవుణు సజమ్ది దూతెజ రాన్అ. పరిసుద్దమాతికాన్* నిజామాతికాన్ ఆతి, దావీదు పట్టుమ్దిజ్ ఏలుబడి: కిదెజ్ అతికారం మన్నివన్నిలెకెండ దన్ని తాలమ్కియు మన్నికాన్ వెహ్నిని మాటెజ్ ఇక్కెజ్. వాండ్రు రేతిజి ఎయెన్బా కెహ్లాజ్ అట్ఎన్. వాండ్రు కెహ్లాజి ఎయెన్బా రేదెజ్ అట్ఎన్.

8 నీను కిజిని పణిజ్ నాను నెసిన. నిజి మన్ని సత్తు కండెక్ ఆతిజ్బా నీను నా మాటెజ్ లొజిజి నా పేరు నెన్ఎ ఇజి వెహ్ఇతి. ఇదిలో నీ ఎదురు నాను సేహ్లా రేత మన్ను. దన్నిజ్ ఎయెన్బా కెహ్లాజ్ అట్ఎన్.

* 3:7 3:7 గొప్పు నెగ్గెకాన్, ఇని తప్పుబా సిలికాన్

9 యూదురు ఆవీండ, మాపు యూదురుజు, మాపు దేవుణు లోకుర్ ఇజి అబద్ధం వెహ్నిని సర్తూను సజమ్దివరిజ్, నీ డగ్రు వాజి నీ పాదమ్కాజ్ అర్చి మాడిస్మిలెకెండ్ నాను కినా. నాను నిజి ప్రేమిస్త మన్న ఇజి అయావలె వారు నెస్సార్లె.

10 స్రమెజ్ డిస్వీండ ఓరిసినివందిజ్ నాను సిత్తి ఆడ్రెజ్ నీను లోజిత్తి మహి. అందెజె బూమి ముస్సు బత్కిని వరిజ్ విజేరిజ్ వాజిని పెరి కస్టమ్కాజ్ కూడితి పరిస కాలమ్దు నాను మిజి కాపాడ్పా.

11 ఇదిలో, నాను బేగినె వాజిన. నీను గెలిస్పివందిజ్ నిజి దొహ్కీని ఇనాయం మరి ఎయెన్బా ఒవీండ, నీను నెస్తిమున్ని వనకాజ్ డిస్వీండ గటిజ అసి మన్అ.

12 సెఇ వనకాజ్ ముస్సు గెలిస్పి వన్నిజ్ నా దేవుణు గుడిడు ఉండ్రీ తంపం లెకెండ్ కిన. వాండ్రు ఎనెజ్బా దన్ని బాణిజ్ డిసి సాన్వన్. నా దేవుణు పేరుని, పరలోకమ్దాన్ దేవుణుబాణిజ్ డిగ్గి వాజిని కొత్త యెరూసలేం ఇని నా దేవుణు పట్టం పేరుని, నా కొత్త పేరుబా నాను వన్ని ముస్సు రాస్సా.

13 దేవుణు ఆత్మ దేవుణు సజమ్కాజ్ వెహ్నినికెజ్ ఇనికెజ్ ఇజి గిబ్బిజ్ ఒడేజి వెంజి అయావజ నడిజి మండ్రు.

లవొదికియ పట్టమ్దు మన్ని దేవుణు సజమ్దిజ్ రాసిని ఉత్రం.

14 “లవొదికియ పట్టమ్దు మన్ని దేవుణు సజమ్ది దూతెజ రాన్అ. నమ్మకమాతికాన్ని నిజమాతి సాసి ఆతికాన్, దేవుణు తయార్ కితి విజు వనకాజ్ ముస్సు అతికారం ఆతి ఆమెన్ ఇనికాన్ వెహ్నిని మాటెజ్ ఇక్కెజ్.

15 నీ పణిజ్ ఎలాగ మర్తికెజ్ ఇజి నాను నెసిన. నీను సలాజ్ మనికి ఆఇ. వేసాజ్ మన్నికిబా ఆఇ. నీను ఎమేణికబా ఉండ్రీ రకం ఆజి

మంజినిక ఇహిజ బాగ మహాద్, ఇజి నాను కోరిజన[†]

16 నీను పణిదిక్ రెఇకి. నీను సలాజ్ సిల్లెద్. వేసాజ్ బా ఆఇ. నీను గోరువేసాజ్ నన్నికి. అందెజె నా వెయుదాన్ నాను నిజీ పూస్సు విసీర్న.

17 నీను గత్ర నన్నికి, దిక్కు గతి సిల్లికి, బీదాదికి, గుడ్డిదికి, డుమ్డ మన్నికి. గాని యాకెజ్ నిజం నెన్ ఏండ, నజీ ఆస్తి మనాద్, నాను డబ్బుజ్ గణస్త మనా, నజీ ఇనిక తక్కు సిల్లెద్ ఇజి నీను వెమో ఆజిని.

18 గాని నాను నిజీ బుద్ది వెహ్నినిక ఇనిక ఇహిజ, నీను ఆస్తి మనికి ఆదెజ్ ఇజి సినుదు సుర్జి సుబరం ఆత్తి బజారం నా బాణిజ్ కోల్ అత్త మరి నీ సిగు డాజినిలెకెండ పొర్ పాదెజ్ తెల్లాని సొక్కెజ్ నా బాణిజ్ కోల్ అత్త. నీ కణుకెజ్ టెటాజ్ తోర్దెజ్ కణుకెజి రాస్తెజ్ కాటికబా నా బాణిజ్ కోల్ అత్త.

19 నాను ప్రేమిసిని విజేరిజ్ బుద్ది వెహ్ని, సిక్కుదాన్ దిదిజినా. అందెజె నీను మన్సుదు నిజం ఆస ఆజి మన్ అత్త. మరి మారు మన్సు పొందిజి నీ పాపమ్ కు బప్పుకోడెజి డిసి సి అత్త.

20 ఇదిలో, నాను సేవ్లా డగ్గు నిల్లి, సేవ్లా రే అత్త ఇజి కొత్తినా. ఎయెన్ బా నా కంటం వెంజి సేవ్లా రేతిజ, నాను లోఇ సొన్ని వన్నివెట బోజనం కినా. వాండ్రుబా నావెట బోజనం కినాన్.

21 నాను ఎలాగ సెఇ వనకాజ్ మున్సు గెలిసి, నా బుబ్బువెట వన్ని సింహాసనమ్ దు బస్త మనానో, అయాలెకెండెనె, సెఇ వనకాజ్ మున్సు గెలిస్సి వన్నిజ్ నావెట నా సింహాసనమ్ దు బస్తెజ్ బా అక్కు సీనా.

22 దేవుణు ఆత్మ దేవుణు సజమ్ కాజ్ వెహ్నినికెజ్ ఇనికెజ్ ఇజి గిబ్బిజ్ బడెజి వెంజి అయావజ నడిజి మండ్రు”.

[†] 3:15 3:15 అవొదికియ పట్టుమిదిక్ డగ్గు గొప్ప పేరు మన్ని రుండి పట్టుమకు మహె. హయెరపోలిస్ ఇని పట్టుమదు వేసాజ్ ఏరు సోని ఉండ్రీ గడ్డ మహాద్. లోకుర్ వరి జబ్బుజ్ సొండ్రెజ్ ఇజి, బాన్ సొన్ని అయ గడ్డాదు ఏరుకెబాజి మహార్. కొలోసాన్ ఇని పట్టుమదు ఉండ్రెజ్ గొప్ప రుసి మన్ని ఏరు సోని ఉండ్రీ గడ్డ మహాద్. గాని అవొదికియ పట్టుమది ఏరు సపాజ్ మహాద్. అందెజె అవొదికియ పట్టుమది దేవుణు సజమ్ దిక్ ఇని పణిదిక్ బా రెఇ సపాజ్ ఏరుదిక్ పొలిసి యేసు క్రీస్తు వెహ్నినాన్ ఇజి సెగెండార్ వెహ్నినార్.

4

పరలోకమీదుమన్ని సింహాసనం.

1 యా సజతిజ్ జర్గితి వెనుక నాను సుడఃతిజ్ ఇదిలో పరలోకమీదు ఉండ్రి సేహ్లా రే ఆతి మహిక సుడఃత. జోడుఃబాంక పలక్తినిన్ని జాటులెకెండ్, నావెట ముజాల వర్గితి మన్ని కంటం మన్నికాన్, “ఇబ్బె ఎక్కి రఅ. దిన్ని వెనుక ఇనికెజ్ జర్గినెలె ఇజి నాను నిజి తోరిస్వాలె”, ఇజి వెహ్లాన్.

2 వెటనె నాను దేవుణు ఆత్మ వెట నిండ్రిత. నస్తివలె పరలోకమీదు ఉండ్రి సింహాసనమీదు ఒరెన్ బస్తిమన్నిలెకెండ్, నా ఎద్దు తోరి ఆతాద్.

3 అయ సింహాసనమీదు బస్తి మన్నికాన్ పొద్దులెకెండ్ గొప్ప జాయ్ మన్ని ఎరాని రంగు పణుకుదిజ్ పోలిసి తోరితాన్. సింహాసనమీదిజ్ సుటులం గొప్ప జాయ్ మన్ని ఆకు రంగుది కొడెఃవేలి మహాద్.

4 అయ సింహాసనమీదిజ్ సుట్టులం ఇరువయ్ నాల్లి సింహాసనమీకు మహె. అయ ఇరువయ్ నాల్లి సింహాసనమీకాజ్, తెల్లాని సొక్కెజ్ తోడిఃగిజి, రాజురి టోపిజ్ నన్ని బజారం టోపిజ్ బురాదు తోడిఃగిజి ఇరువయ్ నాల్వెర్ పెద్దెలుజు బస్త మహార్.

5 అయ సింహాసనమీదాన్ గొప్ప మెర్నిని జాయ్, దీడఃజినికెజ్, పిడుఃగుజ్ వెల్లి వాజి మహె. అయ సింహాసనం ఎద్దు ఏడు దీవెజ్ జాయ్ సీజి మహె. అక్కెజ్ దేవుణు ఏడు ఆత్మెజ్.

6 అయ సింహాసనం ఎద్దు గటి మన్ని గాజుదిజ్ పోలితి సమదరమీలెకెండ్ మహాద్. అక్క ఇని రంగు సిల్లి గటి మన్ని అద్దం లెకెండ్ మహాద్. నడిఃమిని, అయ సింహాసనమీదిజ్ సుటులం, ఒడోల్ ముస్సు, వెనుక ముందాల విజు, కణుకెజాణిజ్ నిండ్రితి మన్ని పాణం మన్ని నాల్లి జంతుజ్ మహె.

7 పాణం మన్ని, మొదోహి జంతు మొకొం సింహం లెకెండ్ మహాద్. రుండి జంతు మొకొం దూడఃలెకెండ్ మహాద్. మూండ్రి జంతు లోకు మొకొం నన్ని మొకొం మహికాద్. నాల్లి జంతు ఎగ్రిని డేగలెకెండ్ మహాద్.

8 యా నాల్గి జంతుజు, ఉండ్రి ఉండ్రి దన్నిజ్ ఆరెసిజ్ రెక్కెజ్ మహె. అయ రెకెజ ముస్సుని అడిఃగి విజు నిండ్రు కణుకెజ్ మహె. అయ నాల్గి జంతుజ్.

“ముజుల మహికాన్, ఏలు మన్నికాన్, వాని కాలమ్దు మంజినికానాతి విజు వనకాజ్ అతికారం మన్ని దేవుణు పరిసుద్దమతికాన్, పరిసుద్దమాతికాన్, *పరిసుద్దమతికాన్”, ఇజి రెయు పొగల్ డిఃస్ఎండ పార్జి మహె.

9 ఎస్తివలెబా అయ పాణం మన్ని నాల్గి జంతుజ్, అయ సింహాసనమ్దు బస్తి మన్ని ఎలాకాలం బత్తిజినికాన్ ఆతి వన్నిజ్, పొగిడిఃజి గవరం సీజి వందనమ్కు వెప్పి పొగిడిఃజి మహారొ,

10 నస్తివలె అయ ఇరువయ్ నాల్ఎర్ పెద్దెలుజు అయ సింహాసనమ్దు బస్తి మన్నివన్నిజ్ ఎద్రు పడగ్జి అర్తారె, ఎలాకాలం బత్తిజిని వన్నిజ్ మాడిఃసి యా లెకెండ్ పొగిడిఃజి వెప్పి మహారొ.

11 “మా ప్రబు ఆతి దేవుణు, విజు వనకాజ్ తయార్ కిత్తికి నీనె. నీను ఇస్టమాతి వజ అక్కెజ్ విజు తయార్ ఆతె. అయాలెకెండ్నె అక్కెజ్ మన్నె. అందెజె నీ గొప్పు గవరం వందిజ్, నీ గొప్పు నత్తు వందిజ్ లోకుర్ విజెరె నిజి గవరం సీజి పొగిడిఃజి మంజినార్”, ఇజి వెప్పి బజురమ్దాన్ తయార్ కిత్తి రాజురి టోపిలెకెండ్ మన్ని వరి టోపిజ్, సింహాసనం ఎద్రు ఇడ్వార్.

5

దేవుణు కియుదు మన్ని పుస్తాకమ్ని గొరెప్పిల్ల.

1 నస్తివలె, లొఇని వెల్లి రాసె ఆతిమని, ఏడు సీలుజ్ పొక్తిమన్ని ఉండ్రి పుస్తకం అయ సింహాసనమ్దు బస్తి మన్నివన్ని ఉణెర్ కియుదు అస్తి మన్నిక సుడఃత.

* 4:8 4:8 ఇని కల్లి సిల్లెండ గొప్పు నెగ్గికాన్

2 “అయ సీలుజ్ లాగ్ని పుస్తకం రెక్తెజ్ తగ్నికాన్ ఎయెన్ మనాన్”, ఇజి గొప్పు సత్తుమన్ని ఒరెన్ దేవుణు దూత డటం డేల్ని వెప్పొక సుడత.

3 గాని, పరలోకమ్దు మన్ని వరి లొఇ గాని, బూమి ముస్కు మన్ని వరి లొఇ గాని, అయా లోకమ్దు మన్ని వరి లొఇ గాని అయ పుస్తకం రెక్తెజ్నో లొఇ సుడతెజ్నో అట్టి ఎంబె వన్నిజ్బా తోర్వితాద్.

4 అయ పుస్తకం రెక్తెజ్నో, లొఇ సుడతెజ్నో తగ్ని ఎయెన్ వన్నిజ్బా తోర్వితెజ్ నాను నండో అడతబాజి మహా.

5 నస్తవలె, అయ పెద్దెలుజలొఇ ఒరెన్, “నీను అడతబామా. ఇదిలో, దావీదు మొదొల్దాన్ సిగ్నిస్తి, యూద కుటుమ్దికాన్ ఆతి సింహం ఇజి పేరు మన్నికాన్, అయ ఏడు సీలుజ్ లాగ్ని పుస్తకం రెక్తెజ్ అట్టి వన్ని లెకెండ్ గెలస్త మనాన్”, ఇజి నజీ వెహ్నాన్.

6 నస్తవలె, అయ పెద్దెలుజు నడిమిని పాణం మన్ని నాల్లి జంతుజు నడిమి మన్ని అయ సింహాసనం నడిమి, ముజాల కత్తె ఆతిమనిక, గాని ఏలు నిల్ని మంజిని ఉండ్రె గొరె పిల్లదిజ్ సుడత. అయ గొరె పిల్లదిజ్ ఏడు కొముకుని ఏడు కణుకెజ్ మహా. అయ కణుకు బూమి ముస్కు విజు బాడ్డిజు పొక్తిమన్ని దేవుణు ఏడు ఆత్తెజ్.

7 వాండ్రు వాతాండ్రె అయ సింహాసనమ్దు బస్తమన్ని వన్ని ఉణెర్ కియుదు మన్ని పుస్తకం లొస్తాన్.

8 వాండ్రు అయ పుస్తకం లొస్తవలె, పాణం మన్ని అయ నాల్లి జంతుజ్ని, అయ ఇరువయ్ నాల్వెర్ పెద్దెలుజు విజేరె, టొయ్లెజ్ని, నమ్మితి వరి పార్దనమ్కు ఆతి నెగ్గి వాసనం సీజిని దుపమ్కు ఇడ్డి మన్ని బజారమ్ది గిన్నెజ్ ఒరెన్ ఒరెన్ వరి కియుదు అస్తారె గొరె పిల్ల ఎద్రు పడగ్జి అర్దార్.

9 అయావలె, “నీను అయ పుస్తకం లొసి, దన్ని సీలుజ్ లాగ్దెజ్ తగ్నిక్కి. ఎందానిజ్ ఇహిజు నీనె కత్తె ఆతి, నీ నలదాన్ విజు జాతిజుణిజ్, విజు బాసెజాణిజ్, విజు లోకుర్ బాణిజ్, విజు దేసమ్కాణిజ్ లోకురిజ్ దేవుణు వందిజ్ కొటి.

10 మరి వరిజ్ దేవుణుదిజ్ ఉండ్రె రాజ్యం లెకెండ్ని వన్నిజ్ పణి కిని

వుజేరిబులెకెండ్ కిత్తి. వారు బూమి ముస్కు ఏలుబడిః కినార్”, ఇజి అయ పాణం మన్ని నాల్గి జంతుజ్ని ఇరువయ్ నాల్ఎర్ పెద్దెలుజు ఉండ్రీ కొత్త పాట పార్డార్.

11 నస్తవలె నాను సుడఃతిజ్ నండొ దూతారి కంటం వెహ. వరి లెక్క కోటి కోటిదిజ్ ఇంక లావ్ మహె. వారు అయ సింహాననమ్దిజ్ని అయ పాణం మన్ని నాల్గి జంతుజ్ని అయ ఇరువయ్ నాల్ఎర్ పెద్దెల్జ సుటులం మంజి,

12 “కత్తె ఆతి గొరె పిల్ల పొగ్డః ఆదెజ్ తగ్నికాన్. అతికారం మన్నికాన్ ఆదెజ్, ఆస్తి మన్నికాన్ ఆదెజ్, గెణం మన్నికాన్ ఆదెజ్, సత్తుమన్నికాన్ ఆదెజ్, మర్యాద లొసె ఆదెజ్, గవరం లొసె ఆదెజ్, పొగ్డః ఆదెజ్ తగ్నికాన్”, ఇజి గొప్పు పెరి కంటమ్దాన్ పార్జి మహార్.

13 నస్తవలె పరలోకమ్దు మన్ని, బూమి ముస్కు మన్ని, బూమి అడిఃగి మన్ని, సమ్దరమ్దు మన్ని, పాణం మనికెజ్ విజు కూడఃజి.

“సింహాననమ్దు బస్తి మన్నివన్నిజ్ని, గొరెపిల్లదిజ్, పొగ్డః ఆజి మంజినిక, మర్యాద, గవరం, సత్తు అంతు సిల్లెండ ఎలాకాలం మనీద్”, ఇజి వనక కంటమ్కాణిజ్ పార్జినిక, పొగ్డఃజి మంజినిక నాను వెహ.

14 పాణం మన్ని అయ జంతుజ్ “ఆమెన్”, ఇజి వెహ్జిజ్ అయ ఇరువయ్ నాల్ఎర్ పెద్దెలుజు పడగ్జి అర్చి, గొరెపిల్లదిజ్ పొగ్డఃజి మాడిఃస్తార్.

6

సీలుజ్

1 నస్తవలె, గొరెపిల్ల అయ ఏడు సీలుజు లొఇ, మొదొహి దన్నిజ్ లాగితిక నాను సుడఃత. అయావలె అయ పాణం మన్ని నాల్గి జంతుజులొఇ, ఉండ్రీ జంతు పిడుఃగు జాటు నన్ని కంటమ్దాన్ “రఅ!”, ఇజి వెహ్జిజ్ వెహ.

2 నాను సుడఃతిజ్, ఉండ్రీ తెల్లాని గుర్రం తొరితాద్. దన్ని ముస్కు ఒరెన్ దొను అసి బస్త మహాన్. వన్నిజ్ బజారమ్దాన్ తయార్ కిత్తి,

రాజురి టోపి నన్ని ఉండ్రి టోపి దోహక్తాద్. వాండ్రు గెలిస్తాకాన్ ఆజి మరి గెలిస్తాజ్ ఇజి సోతాన్.

3 గొరెప్పిల్ల రుండి సీలు లాగితివలె పాణం మన్ని రుండి జంతు “రఅ!”, ఇజి వెప్పాక నాను వెహ.

4 నస్తావలె సిసు నన్ని ఎరాని రంగు మన్ని ఉండ్రి గుర్రం వెల్లి వాతాద్. బూమి ముస్కు మన్ని లోకుర్, ఒరెన్ మరిఒరెన్ వన్నిజ్ నస్తాజ్ ఇజి, బూమి ముస్కు సమదనం సిల్లెండ కిదెజ్ అయ గుర్రం ముస్కు బస్తామన్నివన్నిజ్ అతికారం దోహక్తాద్. వన్నిజ్ ఉండ్రి పెరి కుర్ల దోహక్తాద్.

5 గొరెప్పిల్ల మూండ్రి సీలు లాగితివలె పాణం మన్ని మూండ్రి జంతు “రఅ!”, ఇజి వెప్పాక నాను వెహ. నాను సుడఃతిజ్, ఇదిలో, ఉండ్రి కర్ని గుర్రం తోరితాద్. దన్ని ముస్కు బస్తా మన్నికాన్ తూన్నిక వన్ని కియుదు అస్త మహాన్.

6 “ఉండ్రి రోజుదిజ్ కూలి ఉండ్రి డొక్కు గొదుము ఇజి, మరి, ఉండ్రి రోజుదిజ్ కూలి మూండ్రి డొక్కుజ్ సామ ఇజి వెప్తాన్. మరి నూనెదిజ్ ఒలివ మరికెని, ద్రాసపట్కురసమ్వందిజ్ ద్రాక్స టోటదిజ్ పాడః కిదెజ్ ఆవద్”, ఇజి అయ పాణం మన్ని నాల్లి జంతుజ నడిఃమిహాన్ వెప్పాలెకెండ్ ఉండ్రి కంటం నాను వెహ.

7 గొరెప్పిల్ల నాల్లి సీలు లాగితివలె, పాణం మన్ని నాల్లి జంతు “రఅ!”, ఇజి వెప్పాక నాను వెహ.

8 నాను సుడఃతిజ్ నస్తావలె, నీరు నన్ని రంగు మన్ని ఉండ్రి గుర్రం తోరితాద్. దన్ని ముస్కు బస్తామన్ని వన్ని పేరు, సావు. అయా లోకం వన్ని వెనుక నడిఃజి మహాద్. కుర్లెజాణిజ్, కరుదాన్, జబ్బుజాణిజ్, బూమిదు మన్ని అడిఃవి జంతుజ వెట, బూమి ముస్కు బత్తిజిని వరిజ్ నాల్లి బాటెజ్లోఇహాన్ ఉండ్రి బాటది వరిజ్ నస్తాజ్ ఇజి వన్నిజ్ అతికారం దోహక్త మనాద్.

9 గొరెప్పిల్ల అయ్దు సీలు లాగితివలె, దేవుణు మాట లోజిత్తివందిజ్, మరి దేవుణుమాటవందిజ్ మన్ని నెగ్గి సాస్యం

వందిజ్ కత్తె అతిమన్ని వరి అత్తైజ, పూజ సీని మాలిపీట అడిగి నాను సుడత.

10 వారు గొప్ప పెరి కంటమ్దాన్, “పరిసుద్దమాతికాన్ అతి విజు దన్నిజ్ అతికారం మన్ని నిజమాతి దేవుణు, నీను, మజి సప్తి వరిజ్ దన్నిజ్ తగితి సిక్కు సివండ, బూమి ముస్కు బత్తిని వరిజ్ తీర్పు తీరిసి, సిక్కు సివండ ఎస్సా కాలం మంజినిలె?”, ఇజి డేల్ని వెస్సి మహార్.

11 నస్తివలె వరిజ్ ఒరెన్ ఒరెన్ వన్నిజ్ తెల్లాని సొక్కెజ్ దొహ్కె. వెనుక వారు సప్పె అతిలెకెండెనె సప్పె ఆదెజ్ మన్ని తంబెరిజు లెక్క, మరి వరివెట కూడఃజి పణికితివరి లెక్కబా పూర్తి అనిదాక మరి కండెక్ కాలం కాప్ కిజి మండ్రెజ్, ఇజి వరిజ్ వెహె ఆతాద్.

12 గొరెప్పెల్ల ఆరు సీలు లాగితిక నాను సుడత. నస్తివలె గొప్పు గటిజ బూమి కద్దితాద్. పొద్దు, కర్ని రంగులెకెండె ఆతాద్. నెల పూర్తి, నలరంగు లెకెండె ఎర్రజ్ ఆతాద్.

13 పెరి గాలిదిజ్ దూకె ఆజి బొడె: మరాతి అక్కరి కాయెజ్ రాలితిలెకెండెనె ఆగనమ్దాన్ సుక్కెజ్ రాలై.

14 ఉండ్రె కికితం సుటిసి లెకెండెనె ఆగసం సుటె ఆజి తోవండ ఆతాద్. విజు గొరొక్, నమ్దరం నడిమి మన్ని ఇజిరి దేసెమ్కు విజు వనక వనక బాడ్డిదాన్ డిస్సె సొహె.

15 నస్తివలె, బూమి ముస్కు మన్ని రాజుర్, ఏలుబడి: కినికార్, సయనమ్ది నెయ్యిర్, అస్తి మనికార్, గొప్ప అతికారం మన్నికార్, వెట్టివణి కినికార్ని వెట్టివణిమణసిర్ ఆఇకార్ విజేరె తియెల్ ఆతారె, గొరొక సాలమ్కాజ్ లొఇ, నట్టు పొరొజు డాఃజితార్.

16 వారు గొరొకాజ్ని సట్టుజు యాలెకెండె వెస్సి మహార్, “మీరు మా ముస్కు అర్సి, సింహాననమ్దు బస్తిమన్ని వన్ని మొకొమ్దాన్ని గొరెప్పెల్ల కోపమ్దాన్ మజి డాఃపు”.

17 “ఎందానిజ్ ఇహిజు దేవుణుని గొరెప్పెల్ల బూమి ముస్కు మన్నివరి ముస్కు తీర్పు తీరిస్సి రోజు వాతాద్. వరి ఎద్దు ఎయెన్ నిల్లెజ్ అటూన్?”.

7

సీలు పొకె ఆతి 144,000 లోకుర్.

1 దిన్ని వెనుక బూమి ముస్కుబా సమ్దరం ముస్కుబా మరెక ముస్కుబా గాలి కివండ, నాల్లి దిక్కుజ గాలి అస్తారె బూమిది నాల్లి దిక్కుజ, నాల్వేర్ దూతార్ నిల్సి మంజనిక నాను సుడేత.

2 బత్కిజిని దేవుణుది సీలు అస్తిమన్ని, మరి ఉండ్రీ దూత పొద్దు సోని దరోట్రాన్ వాతిక నాను సుడేత. బూమిదిజ్ని సమ్దారమ్దిజ్ పాడే: కిదెజ్ అతికారం దోహ్క్తిమన్ని దూతార్వెట ఈహు వెహ్త్సన్.

3 “మాపు దేవుణు పణి కినివరి నొద్దుజ సీలు పొక్కిదాక బూమిదిజ్బా, సమ్దరమ్దిజ్బా, మరెకాజ్బా పాడే: కిమాట్”, ఇజి వాండ్రు డటం వెహ్త్సన్.

4 నస్సివలె, సీలు పొకె ఆతివరి లెక్క వెహ్త్తిక నాను వెహ. ఇస్రాయేలుది విజు తెగెజాణిజ్ లక్స నలపయ్నాల్లి వెయిజ్ లోకుర్ మహార్.

5 సీలు పొకె ఆతికార్ యూదా తెగదాన్ పన్నెండు వెయిజ్ లోకుర్ మహార్. రూబెను తెగదాన్ పన్నెండు వెయిజ్ లోకుర్ మహార్. గాదు తెగదాన్ పన్నెండు వెయిజ్ లోకుర్ మహార్.

6 ఆసీరు తెగదాన్ పన్నెండు వెయిజ్ లోకుర్ మహార్. నష్టాలి తెగదాన్ పన్నెండు వెయిజ్ లోకుర్ మహార్. మనసె తెగదాన్ పన్నెండు వెయిజ్ లోకుర్ మహార్.

7 సీమొను తెగదాన్ పన్నెండు వెయిజ్ లోకుర్ మహార్. లేవి తెగదాన్ పన్నెండు వెయిజ్ లోకుర్ మహార్. ఇసాకారు తెగదాన్ పన్నెండు వెయిజ్ లోకుర్ మహార్.

8 జెబులూను తెగదాన్ పన్నెండు వెయిజ్ లోకుర్ మహార్. యోసేపు తెగదాన్ పన్నెండు వెయిజ్ లోకుర్ మహార్. బెన్యామిను తెగదాన్ పన్నెండు వెయిజ్ లోకుర్ మహార్.

తెల్లాని సొక్కెజ్ తోడు:గితిమన్ని గొప్ప మంద లోకుర్

9 దన్ని వెనుక నాను సుడఃతిజ్, విజు దేసమ్కాణిజ్, విజు జాతిజణిజ్, విజేరె లోకుర్ బాణిజ్, విజు బాసెజ్ వర్రిని వరిబాణిజ్ వాతి ఎయెన్బా లెక్క కిదెజ్ అట్తనన్ని గొప్ప మంద లోకుర్ అయ సింహాసనం ఎద్దుని గొర్రెపిల్ల ఎద్దు నిల్సి మంజనిక సుడఃత. వారు తెల్లాని సొక్కెజ్ తొడిగిజి ఈత మరాతి మటెజ్ కికాజ్ అస్త మహార్.

10 “సింహాసనమ్దు బస్తి మన్నికాన్ ఆతి మా దేవుణుని గొర్రెపిల్ల మజి రక్సిస్త మనార్”, ఇజి వారు గొప్ప పెరి కంటమ్దాన్ వెప్పి మహార్.

11 అయ సింహాసనమ్దిజ్ని అయ పాణం మన్ని నాల్లి జంతుజ్ని ఇరువయ్ నాల్వెర్ పెద్దెల్జ సుటులం దేవుణు దూతార్ విజేరె నిహ మహార్. వారు సింహాసనం ఎద్దు పడగ్జి అర్పి దేవుణుదిజ్ పొగిడిజి మూడిస్తార్.

12 “ఆమెన్, వన్ని గొప్ప పేరు వందిజ్, వన్ని గెణమ్వందిజ్, వన్ని అతికారమ్ వందిజ్, వన్ని సత్తువందిజ్ మాటు మా దేవుణుదిజ్ అంతుసిల్లెండ ఎలాకాలం పొగిడిజి మంజినాట్. మాటు విజెటె వన్నిజ్ గవరం సీజి వందనమ్కు వెప్పి మంజినాట్. ఆమెన్”, ఇజి వారు వెప్పి మహార్.

13 నస్తివలె అయ పెద్దెలుజలొఇ ఒరెన్, “యా తెల్లాని సొక్కెజ్ తొడుగితి మనికార్ ఎయెర్? వారు ఎమేణిజ్ వాత మనార్”, ఇజి నజి వెన్బాతాన్.

14 “బాబు నీనె నెస్సి”, ఇజి నాను వన్నిజ్ వెప్టా. వాండ్రు నావెట ఈహు వెప్టాన్. “వీరు గొప్ప పెరి కస్తమ్కాణిజ్ వాతికార్. వారు గొర్రెపిల్ల నలదాన్ వరి సొక్కెజ్ నొరబజి వనకాజ్ తెల్లాజ్ కిత్తికార్.

15 అందెజె, “వారు దేవుణు సింహాసనం ఎద్దు మంజి రెయుపొగొల్ వన్ని గుడిఃదు వన్నిజ్ పణి కిజి మంజినార్. సింహాసనమ్దు బస్తి మన్నికాన్, వాండ్రె ఆజి వన్ని టంబు వరి ముస్కు వ్డక్సి వరిజ్ కాపాడ్నాన్.

16 మరి ఎసెజ్బా వరిజ్ బజ కట్వద్. మరి ఎసెజ్బా వారు ఏప్పి సావర్. పొద్దుది గొప్ప ఏండ వరి ముస్కు తగ్గివద్. మరి సుర్పిలెకెండ

మన్ని వేడిబా వరిజ్ తగ్గివద్.

17 ఎందానిజ్ ఇహిజ, సింహాసనం నడిమి మన్ని గొర్రెపిల్ల వరిజ్ గవుడుఃయెన్ ఆత మనాన్. పాణం సీని ఏరు వాని ఊట డగ్గు వాండ్రు వరిజ్ నడిపిస్సాన్. దేవుణు వరి కణుకేజాణిజ్ కణెర్ విజు తేల్నాన్”.

8

ఏడు సీలుని బజరమ్ది దూపమ్సుర్ని గిన్న

1 గొర్రెపిల్ల ఏడు సీలు లాగితివలె పరలోకమ్దు అరగంట జమ్నె మహాద్.

2 నస్తవలె, దేవుణు ఎద్దు ఏడు దేవుణు దూతార్ నిల్ని మంజనిక నాను సుడఃత. వరిజ్ ఏడు జోడు బాంగెజ్ దొహ్కై మహె.

3 మరి ఒరెన్ దేవుణు దూత బజరమ్దాన్ తయార్ కిత్తిమన్ని దూపం సుర్ని గిన్న కియుదు అస్తాండ్రె దూపం సుర్ని మాలి పెటె ఎద్దు వాతాండ్రె నిహాన్. సింహాసనం ఎద్దు బజరమ్దాన్ తయార్ కిత్తి దూపం సుర్ని మాలి పెటెదు, దేవుణు వందిజ్ కేట ఆతివరి పార్దనమ్కువెట సుర్ని పూజ సీదెజ్ అయ దూతెజ్ నెగ్గి వాసనం సీని దూపం నండొ దొహ్కై.

4 నస్తవలె నెగ్గి వాసనం సీని దూపమ్ది గోయి దేవుణు వందిజ్ కేట ఆతివరి పార్దనమ్కువెట కూడఃజి దేవుణు దూత కియుదాన్ ముస్కు దేవుణు దరోట్ సొహె.

5 వెనుక అయ దేవుణు దూత దూపం సుర్ని గిన్న అస్తాండ్రె, దూపం సుర్ని మాలి పెటెదాన్ డీప్పు లాగ్గి అయ గిన్నాదు నిండ్రెస్తాండ్రె, అయ డీప్పుజ్ బూమి ముస్కు విసిర్తాన్. నస్తవలె గొప్ప దీడఃనికెజ్, పిడుఃగుజ్, మెర్నినికెజ్ విజు వాతె. బూమి కద్దితాద్.

ఏడు జోడుఃబాంకెజ్.

6 నస్తవలె ఏడు జోడుఃబాంకెజ్ అస్తిమన్ని ఏడు దూతార్ వనకాజ్ ఊకెజ్ తయార్ ఆతార్.

7 మొదొహె దేవుణు దూత వన్ని జోడుఃబాంక ఉహ్కైజ్, వడఃజాని సిసు నలదాన్ కూడఃజి బూమి ముస్కు సెదరె ఆజి అర్తె. అందెజె

బూమిదు మూండ్రి వంతుజ లొఇ ఉండ్రి వంతు వెతాద్. మరెక్బా మూండ్రి వంతుజ లొఇ ఉండ్రి వంతు వెతాద్. పసి గడ్డి విజు వెతాద్.

8 రుండి దేవుణు దూత వన్ని జోడుఃబాంక ఉహ్క్తిజ్, కసి మంజిని ఉండ్రి పెరి గొరొన్ నన్నిక సమ్దరమ్దు అర్తాద్. సమ్దరం మూండ్రి వంతుజ లొఇ ఉండ్రి వంతు నల ఆతాద్.

9 సమ్దరమ్దు మన్ని పాణం మన్ని జంతుజ్, మూండ్రి వంతుజ లొఇ ఉండ్రి వంతు సాతె. ఓడెజ్బా మూండ్రి వంతుజ లొఇ ఉండ్రి వంతు నాసనం ఆతె.

10 మూండ్రి దేవుణు దూత వన్ని జోడుఃబాంక ఉహ్క్తిజ్ కగెడలెకెండ్ కసిమంజిని ఉండ్రి పెరి సుక్క ఆగసమ్దాన్ రాల్లి పెరి గడ్డెజ ముస్సుని ఏరు సొని ఊటెజ మూండ్రి వంతుజ లొఇ ఉండ్రి వంతు ముస్సు అర్తాద్.

11 అయ సుక్క పేరు సేందు. అందెజె మూండ్రి వంతుజ ఉండ్రి వంతు సేందు ఆతాద్. ఏరు సేందు ఆతిజ్ లోకుర్ నంణెండార్ సాతార్.

12 నాల్లి దేవుణు దూత వన్ని జోడుఃబాంక ఉక్తిజ్, పొద్దు మూండ్రి వంతుజ లొఇ ఉండ్రి వంతు సెఎణ్ ఆతాద్. నెల మూండ్రి వంతుజ లొఇ ఉండ్రి వంతు సీకటి ఆతాద్. సుక్కెజ దెబ్బ తగ్గితిజ్ మూండ్రి వంతుజ లొఇ ఉండ్రి వంతు సీకటి ఆతాద్. అందెజె వేడెక మూండ్రి వంతుజ లొఇ ఉండ్రి వంతు జాయ్ మన్ఏతాద్. రెయ్యు మూండ్రి వంతుజ లొఇ ఉండ్రి వంతు నెల సుక్కెజ జాయ్ మన్ఏతాద్.

13 నాను సుడ్ఃజి మహిజ్ నంణె ముస్సు ఎగ్రిజి మంజిని ఉండ్రి డేగ, “మరి ఉక్తిజ్ మన్ని మూండ్రి జోడుఃబాంకెజ జాటుదాన్ బూమి ముస్సు బత్తిని వరిజ్, అబాయా కస్టం, కస్టం, కస్టం”, ఇజి గొప్ప పెరి జాటుదాన్ వెహ్మిమన్నిక వెహ్.

9

1 అయ్దు దేవుణు దూత వన్ని జోడు బాంక ఉహ్క్తిజ్ ఆగసమ్దాన్ బూమి ముస్సు రాల్లి మహి ఉండ్రి సుక్క సుడ్ఃత. దర్లిది తాలం కిక్కు అయ సుక్కదిజ్ దొహ్క్తాద్.

2 వాండ్రు అయ మటుసిల్లి దాస్తిమన్ని దర్లిదిజ్ రెతిజ్, గొప్ప పెరి సొల్లుదాన్ సిసుదాన్ గోయ్ వాతి లెకెండ్ గోయ్ వాతాద్. అయ దర్లిదాన్ వాతి గోయ్దాన్ పొద్దుని, ఆగసం సీకటి ఆతాద్.

3 అయ గోయ్దాన్ మేపిలెక్ బూమి ముస్కు వాతె. బూమి ముస్కు మన్ని కిపిడారొదిజ్ మన్నిలెకెండ్ వనకాజ్ సత్తు దొహ్కాక్.

4 నొద్రుజ దేవుణుగుర్తు సిల్లి లోకురిజ్ బాదకిదెజ్నె ఆఎండ, బూమి ముస్కు మన్ని గడ్డిదిజ్బా, ఇని మొక్కదిజ్బా, ఇని మరాతిజ్బా పాడె: కిదెజ్ ఆవిద్ ఇజి వనకాజ్ ఆడ్ర దొహ్కాద్.

5 వరిజ్ సప్తెజ్ వనకాజ్ అతికారం సిల్లెతాద్. గాని అయ్దు నెలెజ్ దాక వరిజ్ హిమ్మెజ్ కిజి మండ్రెజ్ వన్కాజ్ అతికారం దొహ్కాక్ మనాద్. అవిక్ హిమ్మెజ్ కితిజ్ వరిజ్ వాతి కస్టం, కుపిడారొ లోకురిజ్ కట్టిజి వాని నొప్పిలెకెండ్ మహాద్.

6 అయ దినమ్కాజ్ లోకుర్ సావుదిజ్ రెబానార్ గాని సావు వరిజ్ తప్ర ఆనాద్లె. వారు సావువందిజ్ ఆస ఆనార్లె గాని సావు వరిజ్ డిసి సానాద్లె.

7 అయ మేపిలెక్ విదెమ్దిజ్ సాండ్రెజ్ తయార్ కితిమన్ని గుర్తమ్కాజ్ పొలితె మన్నె. బజారమ్దాన్ తయార్ కిత్తి టోపి నన్నిక ఉండ్రె, వనక బురెక ముస్కు మహె. వనక మొకొమ్కు లోకు మొకొం లెకెండ్ మహె.

8 వనక కొప్పు బోదెక బురాతి కొప్పులెకెండ్ మహాద్. వనక పల్కు సింహం పల్కు లెకెండ్ మహె.

9 ఇనుముదాన్ తయార్ కితిమన్ని లెకెండ్ గుండెదిజ్ అడిఃని సొక్కెజ్ వనకాజ్ మహె. వనక రెక్కెజాణి జాటు విదెమ్దిజ్ ఉహ్కొన్నిని గుర్తమ్కు లాగ్జిని రదమ్క గొప్ప పెరి జాటులెకెండ్ మహాద్.

10 వనకాజ్ కిపిడారొ తోకెజ్ నన్ని సాప్పు మన్ని తోకెజ్ మహె. లోకురిజ్ అయ్దు నెలెజ్ గుత్తి బాదెజ్ కిదెజ్ అయ తోకెజి వనకాజ్ సత్తు మహాద్.

11 దర్లిదిజ్ అతికారం మన్ని దూత వరి ముస్కు రాజు లెకెండ్ మహాన్. ఏబ్రి బాసాదు వన్నిజ్ పేరు 'అబదోను' ఇని పేరు. గ్రీకు

బాసాదు వన్ని పేరు 'అఫొలుయోను' ఇని పేరు.

12 మొదొహి కన్ఠం గడఃస్తాద్. ఇదిలో, మరి రుండి కన్ఠమ్కు వాదెజ్ మన్నె.

13 ఆరు దేవుణు దూత వన్ని జోడుఃబాంక ఉహ్క్తిజ్, దేవుణు ఎద్దు మన్ని బజారమ్దాన్ తయార్ కిత్తి పూజ సీని మాలిపీటది కొముజాణిజ్ ఉంఠ్రి జాటు వెహ.

14 “యూప్రటిను ఇని గొప్ప పెరి గడ్డ జోరెదు తోహె ఆతిమన్ని నాల్ఎర్ దూతారిజ్ కుత్తి డిఃస్అ”, ఇజి వెహ్తిక నాను వెహ.

15 బూమి ముస్సు మన్ని లోకురి మూంఠ్రి వంతుజ లోఇ ఉంఠ్రి వంతుది వరిజ్ సప్తెజ్ ఇజి యా పంటాది, యా నెలాది, యా రోజుది, యా గంటవందిజ్ తయార్ కిబె ఆజి ఇఠ్ఠి మన్నికారె, అయ నాల్ఎర్ దూతార్.

16 గుర్రమ్కు ముస్సు ఎక్తిమన్ని సయ్నమ్ది వరిలెక్క రుండి వందెజ్ లెక్కెజ్. వరి లెక్క నిస్సా ఇజి నాను వెహ.

17 గుర్రమ్కాజ్ని వనక ముస్సు బస్తిమన్ని వరిజ్ నజి వాతి కలాదు నాను యాలెకెండ్ సుడఃత. వరిజ్ సిసు నన్ని ఎరాని రంగుది, మరి నీలి రంగుది, మరి పసిజ్ రంగుది గుండెదిజ్ అడిని సొక్కెజ్ మహె. గుర్రమ్క బురెక్ సింహం బురెక్లెకెండ్ మహె. వనక వెయుజాణిజ్ సిసు, గోయ్, రెంజికం వెల్లి వాజి మహె.

18 వనక వెయుజాణిజ్ వాతి సిసు, గోయ్, రెంజికం ఇని మూంఠ్రి దెబ్బెజాణిజ్ లోకురి మూంఠ్రి వంతుజ లోఇ ఉంఠ్రి వంతు లోకుర్ సప్పె ఆతార్.

19 అయ గుర్రమ్క సత్తు వనక వెయుజలొఇని వనక తోకెజ మహె. లోకురిజ్ కట్టి గాయమ్కు కిదెజ్ బురెక్ మన్ని సరాస్లెకెండ్ మన్ని తోకెజ్ వనకాజ్ మహె.

20 యా మూంఠ్రి దెబ్బెజాణిజ్ సావీండ్ మిగిలితి మన్ని లోకుర్ ఏలుబా వరి కిక్కాణిజ్ తయార్ కిత్తిమన్ని దెయమ్కాజ్ని బొమ్మెజ మాడిసినిక డిఃసిసిజి పాపమ్కు ఒప్పుకొండఃజి మన్ను మారిస్వితార్. వారు వరి కిక్కాణిజ్ బజారమ్దాన్, వెండిదాన్, కంసుదాన్,

పణుకుదాన్, సెక్కుదాన్ తయార్ కితిమన్ని సుడేదెజ్ అట్తణ, వెండ్రెజ్ అట్తణ, నడిదెజ్ అట్తణ సత్తు సిల్లి వనకాజ్ మాడిసినిక డిసి సివితార్.

²¹ అక్కాదె ఆఎండ, లోకురిజ్ సప్పిక, గురుజువెట సెట్టి కినిక, రంకు బూలానిక, డొజ కినిక యాలెకెండ్ వారు కిజి మహికెజ్ డిసిసిజి పాపమ్కు ఒప్పుకొండేజి డిసిసిజి మన్ను మారినవితార్.

10

ఇజిరి పుస్తకం అస్తిమన్ని దేవుణు దూత.

¹ నస్తివలె గొప్ప సత్తు మన్ని మరి ఒరెన్ దేవుణు దూత పరలోకమ్దాన్ డిగ్గి వాజినిక నాను సుడేత. వాండ్రు మొసాప్ తొడుఃగిత మహాన్. వన్ని బుర్ర ముస్కు కొడెవేలి సుటె ఆత మహాద్. వన్ని మొకొం పొద్దులెకెండ్ని వన్ని పాదమ్కు తంపం లెకెండ్ మన్ని సిసు కొనెజ్లెకెండ్ మహా.

² వన్ని కియుదు రెక్తిమన్ని ఉండ్రీ పుస్తకం మహాద్. వాండ్రు వన్ని ఉణెర్ పాదం సమ్దరం ముస్కు మట్ట మహాన్. వన్ని డేబ్ర పాదం బూమి ముస్కు మట్ట మహాన్.

³ సింహం ఆక్కర్స్తి లెకెండ్ వాండ్రు ఉండ్రీ గొప్ప పెరి జాటు సిత్తాన్. వాండ్రు జాటు సిత్తివలె ఏడు పిడుఃగుజ్ వనక వనక జాటుజాణిజ్ వర్గితె.

⁴ అయ ఏడు పిడుఃగుజ్ వర్గితివలె, నాను రాసైజ్ తయార్ ఆతిజ్, “అయ ఏడు పిడుఃగుజ్ వర్గితి సజతిజ సీలు పొక్అ. వనకాజ్ రాస్సు”, ఇజి పరలోకమ్దాన్ ఉండ్రీ కంటం వెహ్కాక వెపా.

⁵ నస్తివలె, సమ్దరం ముస్కుని బూమి ముస్కు నిహిమన్ని దేవుణు దూత వన్ని ఉణెర్ కియు పరలోకం దరోట్ పెహ్ండ్రె యాలెకెండ్ వెహ్హాన్.

⁶ పరలోకమ్ని అబ్బె మన్ని విజువనకాజ్ని, బూమిని బూమి ముస్కు మన్ని విజువనకాజ్ని, సమ్దరమ్ని సమ్దరమ్దు మన్ని

విజు వనకాజ్ తయార్ కిత్తికానాతి ఎలాకాలం బత్తిజిని దేవుణు పేరు ఆసి యా లెకెండ్ ఒట్టు పొక్తాన్. “మరి ఆలస్యం మన్ ఏద్”.

7 ఏడు దేవుణు దూత వన్ని జోడుఃబాంక ఊక్కి దినమ్కాజ్ దేవుణుది డాజితి మన్ని సజతిజ్, దేవుణు, వన్ని పణికిని వరివెటని వన్ని ప్రవక్తర్ వెట ముజాల వెహె ఆతిమహిలెకెండ్ పూర్తి ఆనాద్లె”.

8 నస్తివలె పరలోకమ్దాన్ నాను ముజాల వెహిమన్ని కంటం మరి నావెట, “నీను సొన్ని సమ్దరం ముస్కుని బూమి ముస్కు నిహిమన్ని అయ దేవుణు దూత కియుదు మన్ని రెకె ఆతిమన్ని ఇజిరి పుస్తకం లోస్అ”, ఇజి వెహ్తాక నాను వెహె.

9 అందెజె నాను సొన్ని “అయ ఇజిరి పుస్తకం నజీ సిదా”, ఇజి అయ దేవుణు దూతెజ్ లొస్త. వాండ్రు, “దన్నిజ్ లాగ్గి తిన్అ. అయాక నీ పొటాదు సేందు ఆనాద్ గాని నీ వెయ్దు తేనె లెకెండ్ తియాజ్ మంజినాద్”, ఇజి నావెట వెహ్తాన్.

10 అయావలె దేవుణు దూత కియుదాన్ అయ ఇజిరి పుస్తకం నాను లొస్తానె తిహా. అయాక నా వెయుదిజ్ తేనెలెకెండ్ తియాజ్ మహాద్. గాని అక తిహి వెనుక నా పొటాదు సేందు ఆతాద్.

11 అయావలె వాండ్రు, “నీను నండో లోక్కుర్ వందిజ్, నండో జాతిజాణివరివందిజ్, నండో బాసెజ్ వర్గినివరివందిజ్, నండోడార్ రాజుర్వందిజ్ దేవుణు ప్రవక్తలెకెండ్ మరి వెహ్తాజ్ వలె”, ఇజి నజీ వెహ్తాన్.

11

దేవుణు వందిజ్ వాతి రిఎర్ సాసిర్.

1 మరి కొల్త కిని ఉండ్రె డుడ్డు నజీ సితాండ్రె ఈహు వెహ్తాన్. “నీను నిజ్జి దేవుణు గుడిఃని, దేవుణుదిజ్ పూజ సీని మలిపీటదిజ్ కొల్త కిజి, దేవుణు గుడిఃదు పొగిడిఃజి మాడిఃసినివరిజ్ లెక్క కిత.

2 గుడిఃదిజ్ వెల్లి మన్ని డేవ కొల్త కివండ డిఃస్అ. అయాక దేవుణుదిజ్ నమ్మిఇవరి వందిజ్ మన్నిక. వారు సల్పయ్రుండి నెలెజ్ పరిసుద్దమతి యెరూసలేం పట్టుమ్దిజ్ వరికాల్కాణిజ్ మట్వార్లె.

3 మరి నాను నా రిఎర్ సాసిరిజ్ అతికారం సీనాలె. వారు బస్త సాక్సెజ్ తొడిగిజి పన్నెండు వందెజ్ అరువయ్యోస్సు దేవుణు ప్రవక్తరు లెకెండ్ దేవుణు మాటెజ్ సాటిస్సార్.

4 బూమిదిజ్ ప్రబు ఆతి దేవుణు ఎద్రు నిల్చి మంజిని రుండి ఒలివ మరెక్సిని రుండి దీవ డండిజ్ ఆతికారె యా రిఎర్ సాసిర్.

5 ఎయెర్బా వరిజ్ హిమ్సెజ్ కిదెజ్ సుడఃతిజ, వరి వెయుదాన్ సిసు వాజి వరిజ్ వగాతివరిజ్ సుర్న విసీర్నాద్. వరిజ్ హిమ్సెజ్ కిదెజ్ నూణికార్ యాలెకెండ్ సాదెజ్వలె.

6 వారు ప్రవక్తరులెకెండ్ దేవుణు మాటెజ్ వెప్పి దినమ్దు అగనమ్దాన్ పిరు రెవిండ అడ్డు కిదెజ్ వరిజ్ అతికారం మంజినాద్. మరి వరిజ్ ఇస్తమాతి వజి ఎస్తవలెబా బూమిదు మన్ని ఏరుదిజ్ నలలెకెండ్ కిదెజ్, మరి నండొ రకమ్ది జబ్బుజాణిజ్ బూమి ముస్సు మన్ని వరిజ్ బాదెజ్ కిదెజ్ వరిజ్ అతికారం మంజినాద్.

7 వారు సాస్యం వెప్పి మంజినిక పూర్తి ఆతిజనరి దర్లిదాన్ వాని క్రూరమతి జంతు వరివెట ఉద్దం కిజి వరిజ్ నప్పాద్.

8 వరి పీనుగుజ్ యెరూసలేం ఇని అయ పెరి పట్నమ్ది సర్దు అరై మంజినె. అయ పట్నమ్దిజ్ సాదొమ పట్నమ్దిజ్, అయ్గుప్తు దేసెమ్దిజ్ పోలిసి వెహె ఆజినాద్. అబ్బె వరి ప్రబుబా సిలువ పోకె ఆత మహాన్.

9 వరి పీనుగుజ్ మూస్తెజ్ సరి సివిండ విజు దేసెమ్దికార్, విజు తెగిజాణికార్, విజు బాసెజాణికార్, విజు జాతిదికార్ విజేరె మూంత్రినర రోస్సు వరి పీనుగుజ్ సుడఃజి మంజినార్.

10 యా రిఎర్ ప్రవక్తరు బూమి ముస్సు మన్ని వరిజ్ బాదెజ్ కిత్తి వందిజ్, బూమి ముస్సు మనికార్ విజేరె వరిజ్ జర్గితిక సుడఃజి గొప్ప సర్ద ఆజి ఒరెన్ మరి ఒరెన్ వన్నిజ్ ఇనామ్కు సీజి పండొయ్ కినార్.

11 గాని అయ మూంత్రినర రోస్సు ఆతి వెనుక దేవుణుబాణిజ్ పాణం మన్ని ఆత్మ వాజి వరి లొఇ డుఃగితిజ్ వారు కిక్కు బూమిదు తిగ్గిజి నిజ్జ నిల్తార్. వరిజ్ సుడఃతికార్ విజేరె గొప్ప తియెల్ ఆతార్.

12 నస్తవలె, “ఇబ్బె ఎక్కి రదు”, ఇజి పరలోకమ్దాన్ గొప్ప పెరి

కంటమ్దాన్ వరిజ్ వెహ్తిక వారు వెహారె, వరిజ్ పగాత్తికార్ సుడఃజి మహివలెనె వారు మొసొపుదాన్ పరలోకమ్దు పెరె ఆజి సొహార్.

13 అయ గడియూదునె గొప్ప గటిజ బూమి కద్దితిజ్, అయ పట్టుమ్ది పది వంతుజ లొఇ ఉండ్రీ వంతు అర్తాద్. బూమి కద్దితిజ్ ఏడు వెయుజ్ లోకుర్ సాతార్. మిగిలిత్తికార్ గుండెజ్ వణక్సిలెకెండ్రీ తియెలాజి పరలోకమ్దు మన్ని దేవుణుదిజ్ పొగిడితార్.

14 రుండి కన్ఠం వీజితాద్. ఇదిలో, మూండ్రీ కన్ఠం బేగినె వానాద్లె.

మిగిలిత్తిమన్ని ఏడు జోడుఃబాంక.

15 ఏడు దేవుణు దూత వన్ని జోడుఃబాంక ఊక్తిజ్ పరలోకమ్దు గొప్ప పెరి కంటమ్దాన్ యాలెకెండ్రీ డేల్నిని జాటుజ్ వాతె. “యా లోకమ్దు ఏలుదాన్ ఏలుబడిః కినిక, మా ప్రబుజ్ని వన్ని క్రీస్తుజ్ ఆత మనాద్. వాండ్రు అంతుసిల్లెండ్రీ ఎలాకాలం ఏలుబడిః కిజి మంజినాన్లె”.

16 నస్తవలె, దేవుణు ఎద్రు సింహాసనమ్కాజ్ బస్తిమన్ని అయ ఇరువయ్ నాల్ఎర్ పెద్దెలుజు పడగిజి అర్ని దేవుణుదిజ్ యా లెకెండ్రీ వెహ్సి పొగిడిఃజి మాడిఃసి మహార్.

17 “ఏలు మన్నికి, ముజాల మహికి ఆతి, విజుదన్నిజ్ అతికారం మన్ని మా ప్రబు ఆతి దేవుణు, నీను నీ గొప్ప పెరి సత్తుదాన్ ఏలుబడిః కిదెజ్ మొదొలిస్తివందిజ్ మాపు మిజి వందనమ్కు వెహ్సివాన్.

18 దేవుణుదిజ్ నమ్మిఇకార్ ఆతి యా లోకమ్ది లోకుర్ కోపమ్దాన్ నిండ్రీతార్. ఎందానిజ్ ఇహిజ నీను కోపం ఆదెజ్ సమయం వాతాద్. సాతి వరిజ్ విజెరిజ్ నీను తీర్పు తీరిస్తెజ్ గడియ వాతాద్. నీ పణిమణిసిరిజ్, ప్రవక్తరిజ్, నిజి నమ్మిత్తి వరిజ్, నీ పేరు వందిజ్ గవరం సిజి బత్తితి ఇజిరివరిజ్ని పెరివరిజ్ విజేరిజ్ తగితి ఇనాయం సీదెజ్ గడియ వాతాద్. బూమిదిజ్ నాసనం కినివరిజ్, నాసనం కిదెజ్ గడియ వాతాద్”.

19 నస్తవలె, పరలోకమ్దు మన్ని దేవుణుగుడిః రే ఆతిజ్, దేవుణు లోకుర్ వెట కిత్తి ఒట్టు రాస్తి ఇడ్డి మన్ని మందసం తోరె ఆతాద్.

నస్తివలె, మెర్సిని జాయ్, పిడుఃగుజ్, దీడేజినికెజ్, వాతె. బూమి కద్దితాద్. గొప్ప వడఃజెజ్ అరై.

12

ఉండ్రి బోదెలిని ఉండ్రి గొప్ప పెరి సరాస్.

1 నస్తివలె పరలోకమ్దు ఉండ్రి బమ్మాతి గుర్తు తోరితాద్. పొద్దుదిజ్ పొర్నాతి మన్ని ఉండ్రి బోదెలి తోరె ఆతాద్. దన్ని పాదమ్క అడిఃగి నెల మహాద్. బురాదు పనెండు సుక్కెజ్ మన్ని రాజురి టోపిలెకెండ్ ఉండ్రి బజారం టోపి మహాద్.

2 అది పాత డిఃస్త మహాద్. అది ఏరు ఈబాదెజ్ నొప్పిదాన్ గొప్ప డేల్ని అడఃబాజి మహాద్.

3 నస్తివలె, మరి ఉండ్రి గుర్తు పరలోకమ్దు తోరితాద్. ఇదిలో, ఉండ్రి గొప్ప పెరి ఎరాని సరాస్ తోరితాద్. దన్నిజ్ ఏడు బురైకెని పది కొమ్ము మహా. దన్ని బుర్ర ముస్కు రాజురి టోపిలెకెండ్ బజరమ్ది ఏడు టోపిజ్ మహా.

4 ఆగనమ్ది సుక్కెజ మూండ్రి వంతుజ్లోఇ ఉండ్రి వంతు సుక్కెజ్ దన్ని తోక డెయ్జి బూమి ముస్కు అర్స్తాద్. ఏరు ఈబాదెజ్ తయార్ ఆతి మన్ని అయ బోదెలి, ఏరుఈబాతిజ్ సరి, అయ బయిజ్ డిఃజ్దెజ్ ఇజి అయ సరాస్ అయ బోదెలి ఎద్దు నిహ మహాద్.

5 అది ఒరెన్ మరినిజ్ కాస్తాద్. లోకమ్ది లోకురిజ్ విజేరిజ్ ఇనుము డుడ్డుదాన్ ఏలుబడిః కిదెజ్ ఇజి ఒరెన్ కొణ్ణొదిజ్ ఇట్టాద్. అది కాస్తి బయి దేవుణు డగ్గుని వన్ని సింహాననం డగ్గు వెటనె లాగేజి పెరె ఆతాన్.

6 అది పన్నెండు వందెజ్ అరువయ్ రోస్సు, దేవుణు దన్నిజ్ పోస కిదెజ్ ఇజి బిడిఃమ్బూమిదు దన్ని వందిజ్ తయార్ కితిమన్ని బాడ్డిదు ఉహ్కొ సాహాద్.

7 నస్తివలె పరలోకమ్దు ఉద్దం ఆతాద్. మికాయెలు ఇని దేవుణుదూతని వన్ని జటుది దూతార్ కూడఃజి అయ గొప్ప పెరి

సరాస్వెట ఉద్దం కితార్. అయ గొప్ప పెరి సరాస్ని వన్ని దూతార్ మర్జి ఉద్దం కితార్.

8 గాని వారు దేవుణు దూతార్ ముస్సు గెలిస్తెజ్ అట్ఎతార్. అందెజె పరలోకమ్దు మరి ఎసెజ్బా వరిజ్ మండ్రెజ్ బాడ్డి మన్ఏతాద్.

9 లోకమ్దు మన్ని లోకురిజ్ విజేరిజ్ మొసెం కిజి నడిపిసికాన్ ఆతి సెఇకాన్ ఆతి సయ్తాన్ ఇజి పేరు ఇడ్డెః ఆతి మొదోహి సరాస్ ఇని అయ గొప్ప పెరి సరాస్ పరలోకమ్దాన్ బూమి ముస్సు అర్పె ఆతాన్. వాండ్రుని వన్ని దూతార్ బూమి ముస్సు అర్పె ఆతార్.

10 నస్తివలె పరలోకమ్దు యాలెకెండ్ వెప్పిని ఉండ్రీ పెరి కంటం నాను వెహ. “రెయుపోగోల్ మా దేవుణు ఎద్రు, మా తంబెరిజి ముస్సు తప్పు మొప్పి మహికాన్ ఆతి సయ్తాన్ అర్పె ఆత మనాన్. అందెజె వన్ని గొప్ప సత్తుదాన్ మజి రక్సిస్తి దేవుణు ఎలాకాలం ఏలుబడిః కిజి మంజినాన్. మరి అతికారం వన్ని క్రీస్తుజ్ ఆతాద్.

11 మా తంబెరిసిర్ గొరెపిల్ల నలదాన్, వారు వప్తామన్ని సాస్యమ్దాన్ సయ్తాన్ ముస్సు గెలస్త మనార్. వారు వరి సొంత పాణమ్కాజ్ గొప్ప పెరిక ఇజి ఒడిఃబింండ సాదెజ్బా తయార్ ఆత మహార్.

12 అందెజె పరలోకమ్దికిదెరా మీరు సర్ద ఆదు. బూమిదుని సమ్దరమ్దు మన్ని విజేరిజ్ కస్టమ్కునె. ఎందానిజ్ ఇహిజ సయ్తాసు మీ డగ్రు వాత మనాన్. వన్నిజ్ సమయం తక్కునె మనాద్ ఇజి నెసి వాండ్రు నండొ కోపమ్దాన్ నీ డగ్రు వాత మనాన్”.

13 బూమి ముస్సు అర్పె ఆతాన్ ఇజి నెస్తాండ్రె, అయ గొప్ప పెరి సరాస్, అయ మొగకొణొడిజ్ కాస్తి బోదెలిదిజ్ అసి మాలెజి కిదెజ్ ఇజి వెటపెరి రెబాదెజ్ మొదోల్స్తాన్.

14 అందెజె, అయ గొప్ప పెరి సరన్బాణిజ్ తపై ఆజి దేవుణు దన్ని వందిజ్ బిడిఃజ్బూమిదు తయార్ కితి మన్ని బాడ్డిదు ఎగ్రిజి సొండ్రెజ్ ఇజి రుండి పెరి డేగ రెక్కెజ్ దన్నిజ్ దోహ్కె. అబ్బె అయ గొప్ప పెరి

సరాస్ దన్నిజ్ తోవండ ఉండ్రి కాలం, కాలమ్కు, సెగం కాలం పోస కిబె ఆతాద్.

15 నస్తవలె, అయ బోదెలిదిజ్ గడ్డ పెర్రి ఒతెజ్ ఇజి అయ గొప్ప పెరి సరాస్ దన్ని వెయ్దాన్ పెరి గడ్డలెకెండ్, అయ బోదెలి వెనుకహాన్ ఏరు క్కాన్.

16 గాని బూమి బదెజ్ ఆజి రే ఆతాదె, అయ గొప్ప పెరి సరాస్ వెయ్దాన్ కక్తి ఏరుదిజ్ డిజ్జి అయ బోదెలిదిజ్ తోడుః కితాద్.

17-18 అందెజె అయ గొప్ప పెరి సరాస్ అయ బోదెలి ముస్సు కోపం ఆతాదె, దేవుణు ఆడ్రెజ్ లోజిజి యేసువందిజ్ సాసెం వెస్సెమన్నికార్ ఆతి దన్ని పొటాదు పుట్టిమహివరివెట ఉద్దం కిదెజ్ ఇజి తయార్ ఆతాద్. వరివెట ఉద్దం కిదెజ్ ఇజి అయ గొప్ప పెరి సరాస్ సోత్తాదె సమ్దరం ఒడ్డుదు నిహాద్.

13

సమ్దారమ్దాన్ ఎక్కి వాతి జంతు.

1 మరి, పది కొముకుని ఏడు బురెక్ మన్ని ఉండ్రి క్రూరమతి జంతు సమ్దారమ్దాన్ వెల్లి వాతిక నాను సుడేత. దన్ని కొముకాజ్ పది లోపిజ్ మహె. ఉండ్రి ఉండ్రి బుర ముస్సు దేవుణుదిజ్ దుసలాడేజిని ఉండ్రి ఉండ్రి పేరుకు మహె.

2 నాను సుడేతిమన్ని అయ జంతు సిటాడః నొరెస్ లెకెండ్ మహాద్. గాని దన్ని పాదమ్కు ఒడుఃజు పాదమ్కు లెకెండ్ మహె. దన్ని వెయు పెరి నొరెస్ వెయులెకెండ్ మహాద్. అయ గొప్ప పెరి సరాస్ దన్ని నత్తుని వన్ని సింహాసనమ్ని దన్ని గొప్పు అతికారం విజు అయ జంతుదిజ్ సితాన్.

3 అయ జంతుది ఏడు బురెకలోఇ ఉండ్రి బురాదు సాదెజ్ సరియాతి పెరి గాయం తగ్గిత మహాద్. గాని సాదెజ్ సరియాతి అయ పెరి గాయం మాందితాద్. అందెజె బూమి ముస్సు మన్ని లోకుర్ విజేరె బమ్మ ఆజి అయ జంతువెట కూడిఃతార్.

4 అయ జంతుదిజ్ అతికారం సిత్తివందిజ్ వారు అయ గొప్ప పెరి సరాన్దిజ్ పొగిడిజి మాడిసి మహార్. మరి వారు అయ జంతుదిజ్ పొగిడిజి మాడిసి, “యా జంతులెకెండ మన్నికాన్ ఎయెన్బా సిల్లెన్. మరి దన్ని వెట ఉద్దం కిదెజ్ అట్టికాన్ ఎయెన్బా సిల్లెన్”, ఇజి గొప్ప వెప్పి మహార్.

5 పొజె ఆని మాటెజ్ ఆపా వెపా ఆజి దేవుణుదిజ్ దుసలాడిజి వర్గిదెజ్ దన్నిజ్ వెయు వాతాద్. నలపయరుండి నెలెజ్ దన్ని పణిజ్ కిదెజ్ దన్నిజ్ అతికారం దొహ్కాద్.

6 అందెజె దేవుణుదిజ్ దుసలాడిజి, వన్ని పేరుదిజ్ అబద్దం మాటెజ్ వెప్పి, పరలోకమ్దిజ్, పరలోకమ్దు బత్కిని వరివందిజ్ దుసలాడిజి అయ జంతు దన్ని వెయుదాన్ వర్గిజి మహాద్.

7 దేవుణు వందిజ్ కేట ఆతి వరివెట విదెం కిజి, వరిజ్ గెలిస్తెజ్ దన్నిజ్ అతికారం దొహ్కాద్. విజు తెగెజాణివరి మున్కు, విజు జాతిజాణి వరి మున్కు, విజు బాసెజ్ వర్గిని వరి మున్కు, విజు దేసెమ్దివరి మున్కు దన్నిజ్ అతికారం దొహ్కాద్.

8 బూమి మున్కు బత్కినికార్ విజేరె అయ జంతుజ్ పొగిడిజి మాడిస్సార్. బూమి పుట్వండ ముందాల్పె కత్తె ఆతిమని గొర్రెపిల్లదిజ్ సెందితి మన్ని, దేవుణు వెట ఎలాకాలం బత్కిని వరి పేరుకు రాసి ఇడ్డిని పుస్తకమ్దు పేరు సిల్లికార్ విజేరె జంతుదిజ్ పొగిడిజి మాడిస్సార్లె. వరి పేరుకు అయ పుస్తకమ్దు సిల్లెద్.

9 వెండ్రెజ్ మన్కు మన్నికాన్ గిబ్బిజ్ ఒడేజి వెంజి అయావజ నడిజి మండ్రు.

10 ఎయెన్బా ఆఇ దేసెమ్ది వరివెట అస్సె ఆజి, ఆఇ దేసెం సొనికాన్ అయాలెకెండ సొనాన్లె. ఎయెన్బా కుర్దదాన్ సప్పె ఆదెజ్ మన్నికాన్, కుర్దదాన్ సప్పె ఆనాన్లె. దేవుణు వందిజ్ కేట ఆతివరి ఓర్పు, మరి దేవుణు మున్కు వరిజ్ మన్ని నమకం దన్నిదటాన్ తోరె ఆనాద్.

బూమిదాన్ వెల్లి వాతి జంతు

11 మరి బూమిదాన్ మరి ఉండ్రీ క్రూరమతి జంతు వెల్లి వాతిక నాను సుడత. గొర్రెపిల్ల కొము నన్ని రుండి కొముకు దన్నిజ్జ మహె. గాని గొప్ప పెరి సరాన్లెకెండ వర్గిజి మహాద్.

12 అయ జంతుజ్జ, మొదొహి జంతుజ్జ మహి విజు అతికారం దన్ని బాణిజ్జ దొహ్కాద్. అయ అతికారమ్దాన్ బూమి ముస్సు బత్తినికార్ విజేరె సాదెజ్జ సరియాతి గాయం తగ్గిజి నెగెండ ఆతి మన్ని మొదొహి జంతుజ్జ పొగిడిజి మాడిస్సెజ్జ ఇజి బలవంతం కిజి మహాద్.

13 అయ జంతు లోకుర్ విజేరె సూణిలెకెండ ఆగసమ్దాన్ సిను డిగ్గి వాని నన్ని గొప్ప పెరి బమ్మాతి పణిజ్జ గుర్తు లెకెండ కిజి తోరిసి మహాద్.

14 మొదొహి జంతు దన్ని పేరుదాన్ బమ్మాతిపణిజ్జ గుర్తు లెకెండ కిజి తోరిస్సెజ్జ అతికారం దొహ్కాద్ అయ జంతు బూమి ముస్సు బత్తిని వరిజ్జ మొసెం కితాద్. కుర్దదాన్ గాయం ఆతిజ్జబా సావెండ బత్తితి మొదొహి జంతుది బొమ్మ ఉండ్రీ తయార్ కిదెజ్జ ఇజి ఆడ్ర సిత్రాద్.

15 అయ మొదొహి జంతుది బొమ్మదిజ్జ వర్గిదెజ్జ అట్టిలెకెండ పాణం సీదెజ్జ దన్నిజ్జ అతికారం దొహ్కాద్. అందెజె బొమ్మదిజ్జ మాడిస్సెవండ మంజిని వరిజ్జ సప్తెజ్జబా అతికారం దొహ్కా మనాద్.

16 అయ జంతు విజేరిజ్జ, అహిజ ఇజిరికారాతిజ్జబా పెరికారాతిజ్జబా, ఆస్తి మన్నికారాతిజ్జబా బిదాదికారాతిజ్జబా, వెట్టిపణిమణిసిర్ ఆఇకార్ ఆతిజ్జబా వెట్టిపణి కినికారాతిజ్జబా విజేరె వరి ఉణెర్ కిక్కాజ్నో, సిల్లిజ నొద్దుదునో మొదొహి జంతుది గుర్తు పోకె ఆదెజ్జ ఇజి బలవంతం కిత్రాద్.

17 ఎందానిజ్జ ఇహిజ, అయ జంతు పేరునో, దన్ని పేరుది అంకి ఆతి గుర్తునో పోకె ఆతివరిజ్జనె ఆవెండ మరి ఎయెరిజ్జబా ఇనికబా కొండెజ్జనో, పొర్రెజ్జనో అతికారం సిల్లెద్.

18 ఏలు బుద్దిమన్నికాన్ ఎయెన్బా వన్ని బుద్దిదాన్ జంతు అంకి ఎసా ఇజి లెకిస్సెజ్జ అట్టిజ లెక్కిసిన్. అక ఉండ్రీ లోకుది అంకి. ఆరువందెజ్జ అరువయ్ఆరు. యాక లెకిస్సెజ్జ బుద్ది అవ్సరం.

14

గొర్రెపిల్లని లక్కనాల్పయ్నాల్లి వెయ్ లోకుర్.

¹ నస్తివలె, నాను సుడఃతిజ్ అయ గొర్రెపిల్ల యెరూసలేమ్దు మన్ని సియొను గొర్రొన్ ముస్కు నిహ మనాన్. అయ గొర్రెపిల్ల పేరుని, వన్ని బుబ్బాతి దేవుణు పేరు వరి నొద్దుదు రాసె ఆతిమని లక్క నాల్పయ్నాల్లి వెయు లోకుర్ వన్నివెట మహార్.

² గొప్ప పెరి గడ్డాది జాటు లెకెండని గొప్ప పిడుఃగు జాటు లెకెండ ఉండ్రీ కంటం పరలోకమ్దాన్ వాతిక నాను వెహ. నాను వెహిమన్ని కంటం టొయ్ల పలక్తివలె వాతి జాటు లెకెండ మహాద్.

³ అయ లక్క నాల్పయ్ నాల్లి వెయిజ్ లోకుర్ అయ సింహాసనం ఎద్దుని అయ పాణం మన్ని నాల్లి జంతుజు ఎద్దుని ఇరువయ్ నాల్వర్ పెద్దెల్జు ఎద్దు, ఉండ్రీ కొత్త పాట పార్తార్. యా లోకమ్దాన్ కొలె ఆతి, వారె ఆఎండ మరి ఎయెర్బూ అయ పాట నెన్వెతార్.

⁴ వీరు బోదెకవెట కూడఃజి, వరిజ్ వారె సెఇకార్ కిబె ఆఎండ నెగెండ మన్నికార్. గొర్రెపిల్ల ఎంబె సొహిజ్బా వీరుబా వన్నివెట సొన్ని మహార్. వీరు తొలిత పంటితి పంటలెకెండ దేవుణు వందిజ్, మరి గొర్రెపిల్లవందిజ్ బూమి ముస్కు మన్ని విజు లోకుర్ బాణిజ్ ఎర్లె ఆజి కేట ఆతికార్.

⁵ వీరు వెయుదాన్ ఇని అబద్దం మాటబా వర్గివెతార్. వీరు ఇని కల్తి సిల్లి నెగ్గికార్.

మూండ్రీ దేవుణు దూతార్

⁶ నస్తివలె బూమి ముస్కు మన్నివరిజ్ విజేరిజ్, అహిజు విజు జాతిజుణి వరిజ్, విజు తెగాతివరిజ్, విజు బాసెజు వర్గిని వరిజ్, విజు దేసెమ్ది లోకురిజ్, వెహ్తాజ్ దేవుణు వెట ఎలాకాలం మంజిని బత్తు సీని సువార్త అసి మరి ఉండ్రీ దేవుణు దూత ఆగసమ్దు ఎగ్రిజి మంజినిక నాను సుడఃత.

⁷ వాండ్రు, “వీరు దేవుణుదిజ్ లోజిజి, వన్నిజ్ గవరం సీదు. ఎందానిజ్ ఇహిజు వాండ్రు తీర్పు తీరిసిని గడిఃయ వాత మనాద్. అందెజె ఆగసమ్దిజ్, బూమిదిజ్, సమ్దారమ్దిజ్, ఏరు వాని

ఊటెజ పుటిన్సి వన్నిజె పొగిడిజి మాడిస్తు”, ఇజి గొప్ప పెరి కంటమ్దాన్ వెహ్లాన్.

8 మరి ఉండ్రీ దూత వన్ని వెనుక వాజి, “ఉత్పుత్ కిబిన్సి, రంకు బూలాజిని దన్ని పణిజాణిజ్ విజు లోకురిజ్ మత్తు కిబిన్సిలెకెండ్ ఉట్పిన్సికాద్ ఆతి గొప్ప పెరి పట్ను ఆతి బబులోను అర్తాద్, అర్తాద్”, ఇజి వెహ్లాన్.

9-10 అయ రుండి దేవుణు దూతార్ వెనుక, మరి ఒరెన్ దూత వన్ని వెనుక వాజి గొప్ప పెరి కంటమ్దాన్ ఈహు వెహ్లాన్. “ఎయెన్బా అయ జంతుజ్ మాడిసి, దన్ని బొమ్మదిజ్ మొకిజి, దన్ని గుర్తు వన్ని నొద్దుదునొ, కియుదునొ పొకె ఆతికాన్, ఇనికబా కలప్వండ పూర్తి సత్తుదాన్ వాకె ఆజిని దేవుణు గొప్ప కోపం ఇని మత్తు కిబిన్సి కల్లు ఉణాన్లె. గొరెపిల్ల ఎద్దుని, దేవుణు వందిజ్ కేట ఆతికార్ ఆతి దేవుణు దూతార్ ఎద్దు, నెగ్డిసిని సిసుదాన్, వెయిని గందకమ్దాన్ ఇమ్సెజ్ కిబె అనాన్.

11 వారు హిమ్సెజ్ కిబె ఆజిని దన్ని గోయ్ ఎలాకాలం డిస్వండ ముస్కు సొన్ని మంజినాద్. అయ క్రూరమతి జంతుదిజ్ గాని, దన్ని బొమ్మదిజ్ గాని పొగిడిజి మాడిస్సికార్, దన్ని పేరుమన్ని గుర్తు ఎయెన్బా పొకె ఆతిజ అబ్బె రెయుపొగొల్ కాలి సిల్లెండ హిమ్సెజ్ కిబె ఆజి మంజినాన్.

12 అందెజె దేవుణు ఆడ్రెజ్ లోజిజి మంజి, యేసువందిజ్ మన్ని నమకమ్దు నమకమాతివరిలెకెండ్ మంజినికార్, హిమ్సెజ్ విజు డిస్వండ ఓరిసి మంజినార్. వారు దేవుణుదిజ్ సెందితికార్ ఇజి తోరె ఆజినార్.

13 నస్తివలె, “ప్రబు ముస్కు నమకం ఇణ్డిజి ఏలుదాన్ సానికాన్ దేవుణు సీని దీవెనమ్కు మంజినికార్ ఇజి రాన్అ”, ఇజి పరలోకమ్దాన్ ఉండ్రీ కంటం వెహ్లిక వెహ. “నిజమె, వారు కష్టబాడిజినిక డిసి రోమ్నార్. వారు కితిమన్ని పణిదిజ్ తగితి లెకెండ్ వరిజ్ ఇనాయం దొహ్కాద్”, ఇజి దేవుణు ఆత్మ వెహ్లాన్.

బూమిది పంట కొయ్నిక.

14 మరి నాను సుడేతిజ్, ఇదిలో, తెల్లాని మొసాప్ తోరితాద్. “లోకు మరిసి” ఆతి వన్నిజ్ పోలితి ఒరెన్ మొసాప్ మున్సు బస్త మహాన్. వన్ని బుర మున్సు బజారం టోపి మహాద్. వన్ని కీదు తెవుగు మన్ని కొడెవేలి అస్త మహాన్.

15 నస్తవలె మరి ఉండ్రి దేవుణు దూత, దేవుణుగుడిదాన్ వెల్లి వాజి, “బూమిది పంట పండిత మనాద్. కొయ్ దెజ్ కాలం వాతాద్. అందెజె నీ కొడెవేలి అసి కొయ్ అ”, ఇజి మొసాపు మున్సు బస్తమన్ని వన్నిజ్ పెరి కంటమ్ దాన్ వెహ్తాన్.

16 మొసాపు మున్సు బస్త మన్నికాన్ వన్ని కొడెవేలి బూమి మున్సు సెల్ హ్తాన్. బూమిదు పంటితి మన్ని పంట కొయె ఆతాద్.

17 నస్తవలె మరి ఉండ్రి దేవుణు దూత పరలోకమ్ దు మన్ని దేవుణుగుడిదాన్ వెల్లి వాతాన్. వన్నిజ్ బా తెవుగు మన్ని ఉండ్రి కొడెవేలి మహాద్.

18 మరి ఉండ్రి దేవుణు దూత దేవుణుదిజ్ పూజ సీని మాలిపీటదాన్ వెల్లి వాతాన్. వాండ్రు సిసు మున్సు అతికారం మన్నికాన్. “బూమి మున్సు మన్ని ద్రాక్స పట్టు కొయ్ దెజ్ పాకం వాతె. అందెజె తెవుగు మన్ని నీ కొడెవేలిదాన్ దన్ని గెలెజ్ కొయ్ అ”, ఇజి గొప్ప పెరి కంటమ్ దాన్ వాండ్రు కొడెవేలి అస్తమన్ని దూతెజ్ వెహ్తాన్.

19 అందెజె అయ దేవుణు దూత వన్ని కొడెవేలి బూమి మున్సు సెల్ హ్తాండ్రె, ద్రాక్స పట్టు కొయ్ జి, ద్రాక్స పట్టు మట్టి రసం లాగ్ జిని గనుగుదు ఇడ్తాన్. యా గనుగు దేవుణు బాణిజ్ వాజిని సిసునన్ని కోపమ్ దిజ్ గుర్తు.

20 ద్రాక్స పట్టు మట్టిని గనుగుదు పట్టమ్ దిజ్ వెల్లి వారు మట్టార్. రుండి వందెజ్ మయిలుజ్ దూరం, గుర్తం వెయుది కలెమ్ దిజ్ సమానం ఆతిలెకెండ్, అయ్ దు అడుగుజ్ లోతు మన్ని గడ్డ లెకెండ్, అయ గనుగుదాన్ నల సోత్తాద్.

ఏడు దేవుణుడూతార్ని ఏడు జబ్బుజ్.

1 మరి ఉండ్రీ గొప్ప బమ్మాతి గుర్తు పరలోకమ్దు నాను సుడఃత. దేవుణు కోపం పూర్తి ఆనిలెకెండ్ కిదెజ్ ఇజి, కడఃవెరిది ఏడు జబ్బుజ్ అస్తి మన్ని ఏడు దూతారిజ్ సుడఃత.

2 మరి సిసుదాన్ కూడితి మన్ని గాజుదిజ్ పోలితి సమ్దరం లెకెండ్ మన్నిక నాను సుడఃత. అయ క్రూరమతి జంతుజ్ని దన్ని బొమ్మదిజ్, దన్ని పేరుది అంకిదిజ్ లోజివిండ దన్నిజ్ గెలిస్తికార్, దేవుణు వరిజ్ సిత్తి టోయ్లెజ్ అసి అయ గాజు సన్ని సమ్దరం పడఃకాదు నిల్ని మంజినిక సుడఃత.

3 వారు, “ప్రబు ఆతి దేవుణు, విజు దన్నిజ్ అతికారం మన్నికి నీ పణిజ్ గొప్ప పెరికెజ్ని బమ్మాతికెజ్. బూమి ముస్కు మన్ని లోకుర్ ముస్కు ఎలాకాలం రాజు ఆతికి, నీ సరిజ్ నాయం ఆతికెజ్ని నిజమాతికెజ్ మన్నె.

4 ప్రబువా, నీను ఒరిదె గొప్ప నెగ్గికి, నీ నన్నికాన్ మరి ఎయెన్బా సిల్లెన్. లోకుర్ విజేరె నిజి లోజిజి మంజినార్. బూమి ముస్కు మన్ని లోకుర్ విజేరె నీపేరుదిజ్ గవరం సీనార్లె. తోరె ఆతిమని నీతినిజయ్తి మన్ని పణిజి వందిజ్ లోకుర్ విజేరె వాజి నీ ఎద్దు నిజి పొగిడిఃజి మాడిఃస్నార్లె”, ఇజి దేవుణు పణికినికాన్ ఆతి మోసె పాటని గొరెప్పిల్ల పాట పార్తార్.

5 దన్నివెనుక, నాను సుడఃతిజ్ సాస్యమదిజ్ గుడారం ఇని దేవుణు గుడిః పరలోకమ్దు రే ఆతాద్.

6 అయ ఏడు జబ్బుజ్ అస్తి మన్ని ఏడు దూతార్, కల్తిసిల్లి మెర్నిని తెల్లాని సొక్కెజ్ తోడిఃగిజి, దన్ని ముస్కు గుండెదు బజారమ్దాన్ తయార్ కితి జమిదం తోహె ఆజి అయ దేవుణు - గుడిఃదాన్ వెల్లి వాతార్.

7 నస్తివలె, అయ పాణం మన్ని నాల్లి జంతుజు లోఇ ఉండ్రీ జంతు ఎలాకాలం బత్కిజిని దేవుణు కోపమ్దాన్ నిండ్రీతి మన్ని, బజారమ్దాన్ తయార్ కితి ఏడు కుడుకెజ్ అయ ఏడు దేవుణుడూతారిజ్ సిత్తాన్.

8 అయావలె దేవుణు జాయ్దాన్ ని వన్ని సత్తుదాన్ వాతి గోయ్దాన్ దేవుణు గుడిః నిండ్రితాద్. అయ ఏడు దేవుణుదూతార్వెట వాదెజ్ మన్ని జబ్బుజ్ వాజి పూర్తి ఆనిదాక ఎయెన్బా దేవుణు గుడిఃదు డుగ్దెజ్ అట్వతాన్.

16

దేవుణు కోపం నిండ్రితి మన్ని ఏడు కుడుకెజ్

1 నస్తవలె, “మీరు సొన్ని దేవుణు కోపమ్దాన్ నిండ్రితి మన్ని అయ ఏడు కుడుకెజ్ బూమి ముస్సు వాక్తు”, ఇజి దేవుణు గుడిఃదాన్ అయ ఏడు దేవుణుదూతార్జ్ గొప్ప పెరి కంటమ్దాన్ వెహ్తాక వెహ.

2 మొదొహి దెవుణుదూత సొహాండె వన్ని కుడుకాదు మన్నిక బూమి ముస్సు వాక్తిజ్, అయ క్రూరమతి జంతుది గుర్తు పొకె ఆతి వరిజ్ని దన్ని బొమ్మదిజ్ మాడిఃస్సివరిజ్ డటం నొప్పి కిజిని సెఇ పుట్టు పుట్టె.

3 దన్ని వెనుక రుండి దేవుణు దూత సొన్ని వన్ని కుడుకాదు మన్నిక సమ్దరమ్దు వాక్తిజ్, సమ్దరమ్ది ఏరు పీనుగుది నల లెకెండ్ ఆతాద్. అందెజె సమ్దరమ్దు మన్ని పాణం మనికెజ్ విజు సాతె.

4 అయ రుండి దేవుణు దూత వెనుక మూండ్రి దేవుణు దూత సొన్ని వన్ని కుడుకాదు మన్నిక పెరి గడ్డెజిని ఏరు సొని ఊటెజి వాక్తిజ్, వనక ఏరు విజు నల ఆతె.

5 నస్తవలె, “ఏలు మన్నికి, ముజాల మహికి ఆతి నీను ఒరిదె పరిసుద్దమాతికాన్ ఆతికి. ని నన్నికాన్ మరి ఎయెన్బా సిల్లెన్.

6 వారు దేవుణు వందిజ్ కేట ఆతి వరిజ్ని దేవుణు ప్రవక్తరుజ్ సప్టార్. అందెజె వరిజ్ తగ్గిలెకెండ్ తీర్పు తీరిసి, వరిజ్ ఉండెజ్ నల సిత్తిజ్, నీను నీతినిజాయిదాన్ తీర్పు తీరిసినికి ఆజిని”, ఇజి ఏరుదిజ్ అతికారం మన్ని దేవుణు దూత వెహ్సానిక వెహ.

7 అందెజె “నిజమె, ప్రబు ఆతి దేవుణు, విజు దన్నిజ్ అతికారం మన్నికి, నీను తీరిస్సి తీర్పుజ్ నిజమాతికెజ్, నాయమాతికెజ్”, ఇజి పూజ సీని మాలిపీటదాన్ వెహ్తాక వెహ.

8 అయ మూండ్రి దేవుణు దూత వెనుక నాల్గి దేవుణు దూత సొన్ని వన్ని కుడుకాదు మన్నిక, పొద్దుముస్సు వాక్తిజ్ లోకురిజ్ సినుదాన్ సుర్దెజ్ పొద్దుదిజ్ అతికారం దోహ్కాద్.

9 అందెజె లోకుర్ నండో వేడిఃదాన్ వెయ్జి, పుట్కూజ్ని నొప్పి కిబిస్సి జబ్బుజ్ లోకుర్ ముస్సు పొక్తిమన్ని దేవుణు పేరుదిజ్ దుసలాడిఃతార్. గాని వారు, పరి పాపమ్కు ఒప్పుకొడఃజి డిఃసిసీజి మన్ను మారెస్టెజ్ ఒప్వెతార్. వారు దేవుణుదిజ్ పొగిడిఃదెజ్బా ఒప్వెతార్.

10 అయ నాల్గి దేవుణు దూత వెనుక అయ్దు దేవుణు దూత సొన్ని వన్ని కుడుకాదు మన్నిక అయ క్రూరమతి జంతు బన్ని సింహాసనం ముస్సు వాక్తిజ్, అది ఏలుబడిః కిని దేసెం విజు సీకటి ఆతాద్. లోకుర్ వరిజ్ వాజిని నొప్పిజ్ బరిస్టెజ్ అట్వండ పరి నాలికెజ్ అడ్డం కొమ్మా ఆతార్.

11 పరి పుట్కూజవందిజ్, నొప్పిజవందిజ్ పరలోకమ్దు మన్ని దేవుణుదిజ్ దుసలాడిఃతార్. గాని వారు కిత్తి మహి సెఇ పణిజ వందిజ్ ఒడిఃబిజి మన్ను మరిసి పాపమ్కు ఒప్పుకొడఃజి డిఃసిసీదెజ్ ఒప్వెతార్.

12 అయ అయ్దు దేవుణు దూత వెనుక ఆరు దేవుణు దూత సొన్ని వన్ని కుడుకాదు మన్నిక యూప్రటిను ఇని గొప్ప పెరి గడ్డ ముస్సు వాక్తిజ్, తూర్పు దరొటాన్ వాని రాజురిజ్ వాదెజ్ సరి తయార్ ఆతిలెకెండ్ గడ్డ వస్తా సొహాద్.

13 నస్తివలె, అయ గొప్ప పెరి సరాసు వెయుదాన్, మరి అయ క్రూరమతి జంతు వెయుదాన్ని అబద్దం వెప్పి ప్రవక్త వెయ్దాన్ కపొకిజ్ నన్ని మూండ్రి దెయమ్కు వెల్లి వాతిక సుడఃత.

14 అయ దెయమ్కు బమ్మాని గుర్తుజ్ కిజి తోరిసినె. అవి విజు దన్నిజ్ అతికారం ఆతిమన్ని దేవుణు తీర్పు తీరిస్సి, గొప్ప తియెల్ ఆని రోజుదు, దేవుణు వెట ఉద్దం కిదెజ్ ఇజి లోకమ్దు మన్ని విజు రాజురిజ్ కుడుఃప్పి తత్తెజ్ ఇజి పరి డగ్రు సొహె.

15 “ఇదిలో, ఎయెన్బా ఒడిఃబివండ మహివలె, డోఃజారి డోఃజి కిదెజ్ వానిలెకెండ్ నాను వాజిన. నాను వానివలె సిగు ఆనిలెకెండ్

డుమ్డ నడివిండ మండ్రెజ్ ఇజి తెలి ఆజిమంజి వన్ని సొక్కెజ్ కాప్కిజి మంజినికాన్ దేవుణు సీజిని దీవనమ్కు మంజినికాన్ ఆనాన్”.

16 నస్తవలె, అయ దెయమ్కు ఏబ్రి బాసదు ‘అర్మెగెదోను’ ఇజి కూకె ఆజిని బాడ్డిదు లోకమ్ది రాజురిజ్ విజేరిజ్ కుడుప్పి తత్తె.

17 అయ ఆరు దేవుణు దూత వెనుక ఏడు దేవుణు దూత సొన్ని వన్ని కుడుకాదు మన్నిక ఆగనమ్దిజ్ని బూమిదిజ్ నడిమి మన్ని బాడ్డిదు వాక్తిజ్, “పూర్తి ఆతాద్”, ఇజి దేవుణుగుడిలో ఇ మన్ని సింహాసనమ్దాన్ వెప్పిని ఉండ్రీ పెరి కంటం వాతాద్.

18 నస్తవలె మెర్సిని జాయ్, దీడఃజినికెజ్, పిడుగుజ్, విజు వాతె. బూమి గొప్పజ కద్దితాద్. బూమి ముస్కు లోకుర్ పుట్టిబాణిజ్ అసి ఎసెజ్బా జర్గిలెకెండ నస్సా గొప్ప గటిజ బూమి కద్దితాద్.

19 గొప్ప పేరు పొందితిమన్ని బబులోను పట్టుం బదెజ్ ఆజి మూండ్రీ ముకెజ్ ఆతె. దేవుణుదిజ్ నమ్మిఇవరి పట్టుమ్కు అర్తె సొహె. బబులోను పట్టుమ్దిజ్, దన్ని పాపమ్క వందిజ్, సిను లెకెండమన్ని, వన్ని గొప్ప పెరి కోపం మన్ని గిన్న ఉండెజ్ సీదెజ్ దేవుణు ఎత్తు కిత్తాన్.

20 సమ్దరం నడిమి మన్ని ఇజిరి దేనెమ్కు (ద్విపుజ్) విజు ముడుగితె సొహె. గొరొక్ అణసె ఆజి సద్దుజ్ ఆతె.

21 డగ్రు యబాయ్ కేజిజ్ బరు మంజిని వడఃజెజ్ ఆగనమ్దాన్ లోకురి ముస్కు అర్తె. అయ వడఃజెజాణిజ్ తగ్గితి గాయమ్కు గొప్ప పెరికెజాతిజ్, లోకుర్ అయ గాయమ్క వందిజ్ దేవుణుదిజ్ దుసలాడితార్.

17

బోదెలిని జంతు

1 ఏడు కుడుకెజ్ అస్తిమన్ని ఏడు దూతారలో ఇ ఒరెన్ దూత వాతాండ్ర నావెట, “నీను ఇబ్బె రఅ. గొప్ప రంకు బూలాని బోదెలికెండ మన్ని, నండొ గడ్డెజ పడకాదుమన్ని పెరి పట్టుమ్దిజ్ తీర్పు కిజి, సీజిని సిక్కు నిజి తోరిస్సాలె”, ఇజి వెహ్హన్.

2 బూమి ముస్సు మన్ని రాజుర్ దన్ని వెట కూడఃజి గూర్తార్. బూమి ముస్సు బత్కినికార్ దన్ని రంకు బూలాని పణిజాణిజ్ మత్తు ఆజి సోస్తార్.

3 నస్తివలె, దేవుణు ఆత్మదాన్ నిండ్రితి మన్ని నజీ, అయ దేవుణు దూత బిడిఃమ్బూమిదు లాగ్గి ఒత్తాన్. అబ్బె దేవుణు పేరుదిజ్ దునలాడిఃజిని పేరుదాన్ నిండ్రితి మన్ని ఏడు బురెక్ని పది కొమ్ము మన్ని, ఉండ్రి ఎరాని జంతు ముస్సు బస్తిమన్ని ఉండ్రి బోదెలిదిజ్ సుడఃత.

4 అయ బోదెలి నీలి రంగు కూడిఃతి మన్ని ఎరాని రంగుది గొప్ప విలువతి పాత పొర్పాజి, మెర్చిని బజారం, విలువతి రంగుపణకుది విలువతి పూసెజ్ ఇట్కిజి మహాద్. అది కిజి మంజిని సెజ పణిజాణిజ్. మరి అది కిజిని రంకు బూలాని పణిది సెజ గుణమ్కు విజు నిండ్రితి మన్ని ఉండ్రి బజరమ్ది గిన్న కియుదు అస్త మహాద్.

5 అర్దం కిదెజ్ అల్ఃణ లెకెండ్ దన్ని పేరు దన్ని నొద్రుదు యాలెకెండ్ రాసె ఆత మహాద్.

“బూమి ముస్సు మన్ని రంకు బూలాని బోదెకాజ్ని విజు సెజ పణిజ అయ్సి ఆతిమన్ని గొప్ప పెరి బబులోను”.

6 అయ బోదెలి దేవుణు వందిజ్ కేట ఆతిమన్ని వరి నలని యేసువందిజ్ సాస్యం వెప్తాజ్ సప్పె ఆతివరి నల ఉణిజి మత్తు ఆజి సోస్త మహాద్. నాను దన్నిజ్ సుడఃజి నండో బమ్మ ఆత.

7 నస్తివలె, అయ దేవుణు దూత నావెట ఈహు వెప్తాన్. “నీను ఎందానిజ్ బమ్మ ఆజిని అయ బోదెలివందిజ్ని మరి ఏడు బురెక్ని పది కొముకుమన్ని అది బస్తిమన్ని జంతువందిజ్ డాఃజితి మన్ని సజతిజ్ నాను నిజి తెలియ కినా”.

8 నీను సుడఃతి అయ జంతు ముజాల్ మహాద్ గాని ఏలు సిల్లెద్. గాని వెటనె దర్లిదాన్ వెల్లి వాజి, దన్ని వందిజ్ తయార్ ఆతిమని లెకెండ్ నాసనం ఆజి సొనాద్. బూమి పుట్విండ ముజాల్పా, దేవుణు వెట ఎలాకాలం బత్కిని వరి పేరుకు రాసి ఇడఃజిని పుస్తకమ్దు పేర్కు సిల్లి, బూమి ముస్సు బత్కినికార్ అయ జంతుజ్ సుడఃజి, ఇక్క

ముజాల మహాద్, ఏలు సిల్లేద్. గాని మరి వానాద్లె, ఇజి బమ్మ ఆనార్.

9 ఇక్క నెస్సెజ్ గెణం మన్ని మన్ను మండ్రెజ్ వలె. అయ జంతుది ఏడు బురెక్ ఇహిజ, అయ బోదెలి బస్తిమన్ని ఏడు గొరొక్.

10 అయ ఏడు బురెక్, ఏడుగురు రాజురిజ్ బా పోలిత మనార్. అయ్ దుగురుది కాలం గడఃస్తాద్. ఒరెన్ ఏలుబడిః కిజి మంజినాన్. కడెఃవెరిదికాన్ ఇంక రెవండ్రె. గాని వాండ్రు వానివలె, కండెక్ కాలం వాండ్రు ఏలుబడిః కిజి మండ్రెజ్ వలె.

11 అయ క్రూరమతి జంతు ముజాల మహికాండ్రె గాని ఏలు సిల్లికాన్ ఆతి ఎనిమిది రాజు. వాండ్రు, వన్ని ముజాల మహి ఏడు రాజుజ్ సెందితికాన్. వాండ్రు వన్ని వందిజ్ మన్ని ఎలాకాలం మంజిని నాసనమ్దిజ్ సొన్నినాన్.

12 నీను సుడఃతి మన్ని పది కొముకు, పది మణిసి రాజురిజ్ పోలిత మనార్. వరిజ్ ఏలుబడిః కిదెజ్ ఏలుదాక అతికారం దోహ్కావిదె. గాని ఉండ్రె గడియ అయ క్రూరమతి జంతు వెట రాజుర్ తెకెండ్ర వరిజ్ అతికారం దోహ్కాద్లె.

13 వారు ఉండ్రె ఉదెసమ్దాన్ వరి సత్తుని అతికారం విజు అయ జంతుదిజ్ ఒపజెప్పార్లె.

14 వారు గొర్రెపిల్లవెట విదెం కినార్ గాని రాజురిజ్ రాజు, ప్రబురిజ్ ప్రబు ఆతిమన్ని గొర్రెపిల్ల వరి ముస్కు గెలిస్నాన్లె. వాండ్రు కూకె ఆతిమన్నికార్, మరి వన్ని వందిజ్ ఎర్రె ఆతిమన్నికార్ని వన్నిజ్ లోజిజి మంజిని నమ్మకమాతికార్ వన్నివెట మంజినార్లె.

15 నస్తివలె, అయ దేవుణు దూత నజి ఈహు వెప్తాన్. “నీను సుడఃతిమన్ని, అయ గొప్ప రంకు బూలాని బోదెలి బస్తిమన్ని నండో పెరి గడ్డెజ్ ఇనిక ఇహిజ, యా లోకమ్దు మన్ని విజు జాతిజాణికార్, విజు దేసమ్క లోకుర్, విజు తెగాదికార్, విజు బాసెజ్ వర్గినికార్.

16 నీను సుడఃతి మన్ని అయ క్రూరమతి జంతుని అయ పది కొముకు, అయ రంకు బూలాని బోదెలిదిజ్ ఇస్టం ఆవర్. వారు దన్నిజ్

కల్గితి మన్నికెజ్ విజు లాగ్గి విసీర్జి, నగడి కిజి, దన్ని కండ కొయ్జి తింజి, మిగిలిత్తిక సిసుదాన్ సుర్న విసీర్నార్.

17 దేవుణు మాటదు మన్నిలెకెండ పూర్తి ఆనిదాక ఏలుబడిః కిదెజ్ ఇజి అయ క్రూరమతి జంతుజ్, వరి అతికారమ్కు విజు సిదెజ్ ఇజి దేవుణు వన్ని ఉదెసం పూర్తి కిదెజ్ ఇజి వరి మన్నుజ బుద్ది సిత్తాన్

18 మరి నీను సుడఃతి అయ బోదెలి బూమి మున్ను మన్ని రాజురిజ్ మున్ను ఏలుబడిః కిని అయ గొప్ప పెరి పట్టమ్నె”.

18

బబులోసు పట్నం అర్చినిక

1 దిన్ని వెనుక మరి ఒరెన్ దేవుణు దూత పరలోకమ్దాన్ డిఃగ్జి వానిక నాను సుడఃత. వన్నిజ్ గొప్ప పెరి అతికారం మహాద్. వన్నిబాణిజ్ వాతిమన్ని గొప్ప జాయ్దాన్ బూమి విజు జాయ్ ఆతాద్.

2 వాండ్రు గొప్ప పెరి కంటమ్దాన్ ఈహు డేల్చి వెత్తాన్. “గొప్ప పెరి పట్నం ఆతి బబులోసు అరె ఆతాద్, అరె ఆతాద్. అక్క దెయమ్కాజ్ మండ్రెజ్ ఇల్లు ఆత మనాద్. విజు సెఇ ఆత్మెజ్ బత్తిజిని బాడ్డి ఆత మనాద్. విజు సెఇకెజ్ని ఇన్టం కిదెజ్ అట్ఇ పొటిజ్ బత్తిజిని బాడ్డి ఆతాద్.

3 ఎందానిజ్ ఇహిజ మత్తు కబిన్ని కల్లు నన్ని, ఉత్పుత్ కిబిన్ని, దన్ని రంకు బూలాని పణిజాణిజ్, ఉణిజి సోస్తిలెకెండ, విజు దేసెమ్కాణి లోకుర్ సోస్నార్. బూమి మున్ను మన్ని రాజుర్ దన్ని వెట గూర్నార్. దన్నిజ్ మహి నండో లావ్ ఆతిమన్ని, ఒడోల్ది ఆసెజ సర్ల కిబిన్ని పణిజాణిజ్ బూమి మున్ను మన్ని సవుకారిజు గొప్ప ఆస్తి మనికార్ ఆతార్.

4 నస్తవలె, యాలెకెండ మరి ఉండ్రీ కంటం పరలోకమ్దాన్ వెప్పిక వెపా. “నజి ఇన్టమాతికిదెరా, మీరు దన్ని పాపమ్క లొఇ కూడఃజి మన్ఏండ, దన్ని జబ్బుజ్ ఇనికబా మిజి అన్ఏండ, మీరు దన్ని బాణిజ్ వెల్లి రదు.

5 అది కిత్తి పాపమ్కు ఆగసమ్దు అందితిలెకెండే కొట్టు ఆతె మన్నె. అది కిత్తి తప్పజ్ విజు దేవుణు ఎత్తు కిత మనాన్.

6 అది సిత్తిమన్ని లెకెండేనె దన్నిజ్ సీదు. అది కిత్తి మన్ని పణిజ రుండి వంతుజ్ దన్నిజ్ కిదు. అది కలప్తిమన్ని దన్ని గిన్నదాన్ ఉండెజ్ రుండి వంతుజ్ కలప్పి దన్నిజ్ సీదు.

7 నాను రాణిలెకెండే బస్త మన్ను. నాను రాండి బోదెలి ఆవద్. నాను ఎసెజ్బా దుకమ్దాన్ అడఃబావీ”, ఇజి దన్ని మన్నుదు అది పొజిజినాద్. అందెజె దన్నిజ్ అదినె ఎస్సానొ పొజిజి ఒడొఃలీది ఆసెజ సర్ద కిబిస్తెజ్ కిత్తిమన్ని పణిజ సమానం ఆతి నసా దుకమ్ని హిమ్సెజ్ దన్నిజ్ మర్జి సీదు.

8 అందెజె, ఉండ్రె రోజుదునె, జబ్బుజ్, దుకం, కరు ఇని బాదెజ్ దన్నిజ్ వానె. దన్నిజ్ తీర్పు తీరిసి సిక్స సీని ప్రబు ఆతి దేవుణు గొప్ప సత్తు మన్నికాన్, అందెజె దన్నిజ్ సిసుదాన్ సుర్న విసీర్నాన్.

9 అది సురె ఆని సిసుదాన్ వాని గోయ్ సుడఃజి, దన్ని వెట గూర్తి మహికార్, దన్ని ఒడొఃలీది ఆసెజ సర్ద కిబిస్సి పణిజ వందిజ్ కూడిఃతికారాతి బూమి ముస్సు. మన్ని రాజుర్ గుండె కొత్తె ఆజి దన్ని వందిజ్ అడఃబానార్.

10 వారు, దన్నిజ్ వాతి సిక్సదిజ్ సుడఃజి తియెలాజి దూరం నిల్సి మంజి, అడఃబాజి, “అబాయా, అబాయా, గొప్ప పెరి పట్టుమాతి బబులోను, సత్తుమన్ని పట్టుమా, ఉండ్రె గడిఃయూదునె నాసనం వాతాద్”, ఇజి వెవె ఆజి మంజినార్.

11 అయ పట్టుం నాసనం ఆతిక సుడఃజి, వరి వస్తుజ్ కొణికార్ మరి ఎయెర్బా సిల్లెర్ ఇజి బూమి ముస్సు. మన్ని బేరం కినికార్ దన్నిజ్ సుడఃజి గుండె కొత్తె ఆజి అడఃబానార్.

12 వారు పొర్తి మహి వస్తుజ్ ఇహిజ, బజారం, వెండి, విలువాతి రంగు పణకుజ్ని పూసెజ్, విలువాతి నూలు పాతెజ్, మరి నీలి రంగు కూడిఃతి ఎరాని పాతెజ్, సిల్కు పాతెజ్, విలువాతి నల రంగునన్ని ఎరాని పాతెజ్, రకరకమ్ది గందం మరాతి ఒస్తుజ్, ఏనుగు కొముకాణిజ్ తయార్ కిత్తి రకరకమ్ది ఒస్తుజ్, నండొ విలువ మన్ని

మరెకాణి ఒస్తుజ్, కంసు, ఇనుము, నునాజ్ మన్ని పణకు సెక్కెజ్, దాసిని మరాతి తోలు, వాసనం మన్ని కాయెజ్, దూపం సుర్ని ఒస్తుజ్, వాసనం మన్ని నూనె, కల్లు,

13 ఒలివ నూనె, మెత్తాని దూరు, గొదము, కోడ్డిజ్, గొర్రెజ్, గుర్రమ్కు, గుర్రమ్కు లాగ్గిని బండిజ్, వెట్టిపణి కిని లోకురిజ్బా వారు పొర్ని మహార్. ఎలుదాన్ ఇక్కెజ్ కొణికార్ సిల్లెర్ ఇజి వారు అడఃబానార్.

14 “నీను కోరిత్తిమన్ని విలువతి గొప్ప నెగ్గి వస్తుజ్ విజు నీ బాణిజ్ లాగె ఆతాద్. మరి ఎసెజ్బా మర్జి దొహ్కెఇలెకెండ్, నీ విలువతి వస్తుజ్ని ఆస్తి విజు సిల్లెండాతాద్ ఇజి సమ్కారిజు దన్నిజ్ వెహ్నార్.

15 అయ పట్నమ్దు సొన్ని వరి వస్తుజ్ పొర్ని దన్ని బాణిజ్ ఆస్తి గణస్తికార్ ఆతి బేరం కినికార్, దన్నిజ్ వాతిమన్ని బాదెజ్ సుడఃజి తియెలాజి గుండె కొత్తె ఆజి అడఃబాజి యాలెకెండ్ వెహ్నార్.

16 “అబాయా, అబాయా, విలువతి నూలు పాతెజ్, నీలిరంగు కూడితి మన్ని ఎరాని పాతెజ్ని నలరంగు నన్ని విలువతి ఎరాని పాతెజ్ పొర్నాజి, మెర్నిని బజారమ్ని విలువతి రంగు పణకుజ్ని పూసెజ్ అయ పట్నమ్దు దొహ్కె మహాద్.

17 నిస్సా గొప్ప పెరి ఆస్తి ఉండ్రి గడియూదునె పాడాఃత సొహదా ఇజి ఓడెఃజు నడిఃపిసిని విజు నెయ్కెర్, ఓడెఃజు పయనం కినికార్, ఓడెఃజు పణి కినికార్, సమ్దరమ్దు పణి కిజి బత్కినికార్ విజేరె దూరం నిల్లిమంజినార్.

18 అది సురె ఆజిని సిసుది గోయి సుడఃజి, “యా గొప్ప పెరి పట్నమ్దిజ్ సమానం ఆతి మరి ఉండ్రి పట్నం ఎంబెబా మనాదా”, ఇజి గొప్ప డేల్ని వెహ్నార్.

19 వారు వరి బురెకాజ్ ముస్కు దుల్లి వాకె ఆజి గుండె కొత్తె ఆజి అడఃబాజి.

“అబాయ, అబాయ, సమ్దరం ముస్కు ఓడెఃజ్ మనికార్ విజేరె బేరం కిజి ఆస్తి గణస్తి మన్ని యా గొప్ప పెరి పట్నమ్ది ఆస్తి ఉండ్రి

గడియారునె నాసనం ఆత సాహాద్”, ఇజి డటం డేల్ని మంజినార్.

20 పరలోకమ్దు మన్నికిదెరా, అయ పట్టుం నాసనం ఆతివందిజ్ మీరు సర్ల ఆదు. దేవుణుదిజ్ నమ్మిత్తికిదెరా, అపొస్తురు ఆతికిదెరా, దేవుణు ప్రవక్తరు ఆతికిదెరా మీరు సర్ల ఆదు, ఎందానిజ్ ఇహిజ అది ఎలాగ మిజీ తీర్పు సిత్త మనాదో, అయాలెకెండెనె దేవుణు అయ పట్టుం ముస్సు తీర్పు తీరిస్త మనాన్.

21 నస్తివలె, సత్తుమన్ని ఒరెన్ దేవుణు దూత, ఉండ్రి గొప్ప పెరి జత్త పణుకు నన్ని ఉండ్రి పెరి పణుకు పేర్జి సమ్దరమ్దు విసీర్తాండ్రె, “మరి ఎసెజ్బా తోర్ఏండాతిలెకెండ గొప్ప పెరి పట్టుమాతి బబులోను గొప్ప పెరి టండెజాణిజ్ యాలెకెండ అడిఃగి అరె ఆనాద్లె.

22 టోయ్లెజ్ పలక్కి జాటుజ్, పాటెజ్ పార్నివరి జాటుజ్, పిరుడిః ఊక్కి జాటుజ్, జోడుఃబాంక ఊక్కి జాటుజ్ మరి ఎసెజ్బా మీబాణిజ్ వెన్పె ఆఱ. ఎమేణి రకమ్ది పణి కినికాన్ ఎయెన్బా, మరి ఎసెజ్బా మీబాన్ తోర్ఏన్. జత్తపణుకుదు నూర్ని జాటు మరి ఎసెజ్బా మీ లోఇహాన్ వినె ఆవ

23 ఉండ్రి దీవ మరి ఎసెజ్బా మీలోఇ జాయ్ సీజి మన్ఏద్. పెండ్లి దజ్డః జాటు గాని పెండ్లి బోదెలి జాటు గాని మరి ఎసెజ్బా మీలోఇ వెన్పె ఆఱ. నీ బేరం కినికార్, బూమి ముస్సు మన్ని గొప్ప పెరికార్ ఆత మహార్. విజు దేసెమ్కాణి లోకుర్ విజేరె నీ మాయ పణిజాణిజ్, మొసెం కిజి, తప్పు సరిదు నీను నడిఃపిస్సి.

24 మరి దేవుణు ప్రవక్తరిజ్ సప్తివందిజ్, దేవుణుదిజ్ నమ్మిత్తి వరిజ్ సప్తి వందిజ్, బూమి ముస్సు సప్పె ఆతి విజేరె వందిజ్ బబులోను పట్టుమ్దిజ్ యా సిక్కు వాతాద్”, ఇజి అయ దేవుణు దూత వెప్తాన్.

19

దేవుణుదిజ్ పొగిడిఃదు (హల్లెలుయ)

1-2 దన్ని వెనుక పరలోకమ్దు గొప్ప పెరి మంద లోకురి గొప్ప పెరి కంటం యాలెకెండ వెహ.

“దేవుణుడిజ్ఞానం పొగిడింది. మజి రక్తిస్త్రీవన్నిజ్ఞానం పొగిడింది. వాండ్లు ఒరెండ్రె పూర్తి జాయ్ ని సత్తు మన్నికాన్. ఎందానిజ్ఞానం ఇహిజ, ఎస్తివలెబా వాండ్లు నిజమాతి, నాయమాతి తీర్పుజ్ఞానం సీజినాన్. దన్ని రంకు బూలాని పణిజాణిజ్ఞానం బూమి ముస్సు మన్ని వరిజ్ఞానం అది పాడ్ః కిత్తాద్. అయ గొప్ప రంకు బూలాని బోదెలిదిజ్ఞానం వాండ్లు తీర్పు తీరిసి సిక్సన్. వన్ని పణికినివరి సలవందిజ్ఞానం వాండ్లు దన్నిజ్ఞానం అయాలెకెండెనె మర్జి సిక్సన్.

3 వెనుక వారు మరి ఈహు డేల్ని వెహ్టార్. “హల్లెలుయ. అది సిసుదు సురె ఆజిని గోయ్ డిన్ ఏండె ఎలాకాలం ముస్సు సొన్ని మంజినాద్.

4 సస్తివలె, అయ ఇరువయ్ నాల్ ఎర్ పెద్దెలుజ్ఞానం, పాణం మన్ని నాల్లి జంతుజ్ఞానం పడగ్జి అర్ని “ఆమెన్, దేవుణుడిజ్ఞానం పొగిడింది”, ఇజి వెహ్ని సింహాసనమ్ దు బస్తిమన్ని దేవుణుడిజ్ఞానం మాడిస్తార్.

5 “మా దేవుణుడిజ్ఞానం సెందితికిదెరా, వన్నిజ్ఞానం లోజిజి మంజిని ఇజిరికార్ ని పెరికార్ ఆతికిదెరా, మీరు విజిదెరె దేవుణుడిజ్ఞానం పొగిడింది”, ఇజి వెహ్నిని ఉండ్రి కంటం అయ సింహాసనమ్ దాన్ వాతాద్.

6 సస్తివలె, గొప్ప పెరి గడ్డ సొని జాటులెకెండెని పిడుఃగుజ గొప్ప పెరి జాటుదిజ్ఞానం పోలితి గొప్ప పెరి మంద లోకురి కంటమ్ లెకెండె ఉండ్రి జాటు యాలెకెండె వెహ్నినిక నాను వెహ. “హల్లెలుయ! మా ప్రబు ఆతి దేవుణు, విజి దన్నిజ్ఞానం అతికారం మన్నికాన్ ఏలుబడిః కిజినాన్.

7 అందెజె మాటు సర్ల ఆజి డాట్నాట్. వన్నిజ్ఞానం గవరం సీనాట్. ఎందానిజ్ఞానం ఇహిజ గొరెపిల్ల పెండ్లి సమయం వాతాద్. వన్నిజ్ఞానం, పెండ్లి దజ్ఞానం దన్నిజ్ఞానం అది నె తయార్ కిజినాద్”.

8 “దన్నిజ్ఞానం పొర్నాదెజ్ఞానం ఇజి నమ్మితి వరి నీతి నిజాయితి మన్ని పణిజాతి సుబ్బరం ఆతి గొప్ప జాయ్ మన్ని, మెర్నిని పాతెజ్ఞానం దన్నిజ్ఞానం దోహ్కె.

9 మరి “గొరెపిల్ల పెండ్లి విందుదు కూకె ఆతికార్ దీవనమ్ కు పొందితికార్ ఇజి రాన్ అ”, ఇజి అయ దేవుణు దూత నజి వెహ్టాన్.

“యా మాటెజ్ దేవుణు వెప్తి నిజమాతి మాటెజ్”, ఇజిబా అయ దేవుణు దూత నజి వెప్తోన్.

10 అయావలె, నాను వన్నిజ్ పొగిడిఃజి మాడిఃస్తెజ్ ఇజి వన్ని పాదమ్కాజ్ పడగ్జి అర్తిజ్ వాండ్రు, “నీను అయాలెకెండ్ కిమా. నానుబా, యేనువందిజ్ సాస్యం వెహ్నిని మీ తంబెరిజవెటని, నీ వెట కూడఃజి పణికినికాండ్రె. దేవుణుదిజ్నె పొగిడిఃజి మాడిఃన్అ. దేవుణుబాణిజ్ వాతి మాటెజ్, దేవుణు ఆత్మదాన్ వెప్తి దేవుణు పణిమణిసిర్ యేను తోరిస్తమన్ని నిజమాతికెజ్నె వెహ్నినార్”, ఇజి నజి వెప్తోన్.

తెల్లాని గుర్రమ్మున్ను బస్తి మన్నికాన్.

11 మరి పరలోకం రే ఆతిమనిక నాను సుడఃత. ఇదిలో, తెల్లాని గుర్రం ఉండ్రె తోరితాద్. దన్ని మున్ను బస్తి మన్నికాన్, నమ్మకమాతికాన్, నిజామాతికాన్ ఇని పేరు మన్నికాన్. వాండ్రు నాయమ్దాన్ తీర్పు తీరిసి లోకురిజ్ సిక్స సీజి, నాయమ్దాన్ వన్ని విదెం కిజి మంజినాన్.

12 వన్ని కణుకు సిసుకొనెజ్లెకెండ్ మన్నె. వన్ని బుర మున్ను బజురమ్దాన్ తయార్ కిత్తి రాజురి టొపిజ్ నన్ని, నండొ టొపిజ్ మన్నె. వన్నిజె ఆఎండ మరి ఎయెర్బా నెన్ఇ ఉండ్రె పేరు వన్ని మున్ను రాసె ఆతిక, వన్నిజ్ మనాద్.

13 నలాదు ముడుఃక్తిమన్ని సొక్క వాండ్రు తొడుఃగిత్త మనాన్. దేవుణు మాట ఇని పేరు వన్నిజ్ మనాద్.

14 పరలోకమ్దు మన్ని సయ్నమ్దికార్, కల్లిసిల్లి తెల్లాని నూలు పాతెజ్ తొడిఃగిజి తెల్లాని గుర్రమ్క మున్ను ఎక్సి వన్నివెట సొన్ని మహార్

15 దేసెమ్కాణి లోకురిజ్ డెయ్దెజ్, వన్ని వెయ్దాన్ తెవుగు మన్ని ఉండ్రె కుర్ద వెల్లి వాజి మహాద్. వాండ్రు ఇనుము డుడ్డుదాన్ వరిజ్ ఏలుబడిః కినాన్. విజు దన్నిజ్ అతికారం మన్ని దేవుణుది సిను నన్ని కోపం, గనుగుదు ద్రాక్స పట్టు. మటిసి ద్రాసపట్టురసం లాగ్నిలెకెండ్, వాండ్రు మటిసినాన్.

16 రాజురిజ్ రాజుని ప్రబురిజ్ ప్రబు ఇని పేరు వన్ని సొక్క ముస్సుని వన్ని కుర్గుదు రాసె ఆత మనాద్.

17-18 మరి ఉండ్రీ దేవుణు దూత పొద్దుదు నిహి మనిక నాను సుడత. వాండ్రు గొప్ప పెరి కంటమ్దాన్ డేల్ని వెహ్లాన్. “దేవుణు నండో కండ సీని గొప్ప పెరి విందుదిజ్ రదు. రాజురి కండ, మరి సయ్నమ్దిజ్ నడిఃపిసినివరి కండ, మరి గొప్ప సత్తుమన్నివరి కండ, గుర్తమ్క కండ, మరి వన్కా ముస్సు బస్తిమన్నివరి కండ, మరి వెట్టిపణిమణిన్ ఆఇవరి కండ, వెట్టిపణి కినివరి కండ, ఇజిరి వరి కండ, పెరివరి కండ, యాలెకెండ్ లోకుర్ విజేరి కండ తిండ్రెజ్ మీరు రదు”, ఇజి ఆగసం అడిఃగి ఎగ్రిజిని విజు పొటిజ వెహ్లాన్.

19 నస్తివలె, అయ గుర్తం ముస్సు బస్తిమన్నివన్నివెటని వన్ని సయ్నమ్ది వరివెట విదెం కిదెజ్ ఇజి, అయ క్రూరమతి జంతుని బూమి ముస్సు మన్ని రాజుర్ని వరి సయ్నమ్కు విజు కూడఃజి వాతిక నాను సుడత.

20 నస్తివలె, అయ క్రూరమతి జంతుని దన్ని పేరుదాన్ బమ్మాని పణిజ్ గుర్తు లెకెండ్ కిజి తోరిస్తి మన్ని అబద్దం వెహ్ని ప్రవక్తబా అస్సె ఆతార్. అయ క్రూరమతి జంతుది గుర్తు పొకె ఆతి వరిజ్ని దన్ని బొమ్మదిజ్ పొగిడిఃజి మాడిఃస్తి మహివరిజ్ వాండ్రు బమ్మాతి పణిజాణిజ్ మొసెం కిజి మహాన్. వారు రిఎర్ గందకం వెయ్జిని సిసు మన్ని బాడ్డిదు పాణం డసానె అర్పె ఆతార్.

21 మిగిలిత్తి మహికార్, గుర్తం ముస్సు బస్తిమన్ని వన్ని వెయుదాన్ వాతి కుర్దదాన్ సప్పె ఆతార్. పొటిజ్ విజు వనక పొట పంజు వరి కండ తిహె.

20

వెయిజ్ పంటెజ్ మన్ని ఏలుబడిః

1 మరి దర్జిది తాలమ్కియుని ఉండ్రీ గొప్పు పెరి గొలును కీదు అస్తిమన్ని మరి ఒరెన్ దేవుణు దూత, పరలోకమ్దాన్ డిగ్జి వాతిక నాను సుడేత.

2 వాండ్రు, అయ మొదొహి సరాన్దిజ్, అహిజ అయ గొప్పు పెరి సరాన్ ఇని, సయ్తాను ఇని సెజ వన్నిజ్ అస్తాండ్రె వెయు పంటేజ్ దాక తొప్తా డిస్తాన్.

3 అయ వెయు పంటేజ్ గడేస్సిదాక ఎమేణి దేసెమ్కాణి లోకురిజ్బా మొసెం కివండ మండ్రెజ్ ఇజి అయ గొప్పు పెరి సరాన్దిజ్, దర్జిదు అర్ఫి మూక్కి దన్ని ముస్కు సీలు పొక్తాన్. వెయిజ్ పంటేజ్ వెనుక వాండ్రు సెగం కాలం వన్నిజ్ కుత్తి డిస్తాన్.

4 నస్తివలె, నాను సింహాసనమ్కాజ్ సుడేత. అయ సింహాసనమ్క ముస్కు బస్తిమన్నివరిజ్, తీర్పు తీరిస్తెజ్ అతికారం దొహ్కె. దేవుణు మాట వందిజ్ని యేసువందిజ్ వారు వెప్తి సాస్యం వందిజ్ బురెక్ కత్తె ఆతివరి ఆత్మ సుడేత. వారు అయ క్రూరమతి జంతుదిజ్నో, దన్ని బొమ్మదిజ్నో పొగిడిజి మాడిసేవండ మహికార్. వరి నొద్దుజ గాని వరి కికాజ్ గాని దన్ని గుర్తు పొకె ఆవండ మనికార్. వారు బత్తిత్తారె వెయు పంటేజ్ క్రీస్తు వెట కూడేజి ఏలుబడికి కితార్.

5 (మిగిలిత్తి మన్ని సాతికార్ అయ వెయిజ్ పంటేజ్ వీజినిదాక బత్తివితార్) యాకాదె సాతి వరిబాణిజ్ తొలిత మర్జి నిజె అనిక.

6 తొలిత మర్జి నిజేనిదన్నిలో ఇ కూడేజి మంజినికార్ దేవుణు సీని దీవనమ్కు మన్నికార్. వారు దేవుణు వందిజ్ పూర్తి కేట ఆతికార్. నిన్నివరిముస్కు రుండి సావుదిజ్ అతికారం సిల్లెద్. గాని వారు దేవుణుదిజ్ని క్రీస్తుజ్ పూజేరిబులెకెండ్ మంజి క్రీస్తు వెట కూడేజి వెయిజ్ పంటేజ్ ఏలుబడికి కినార్.

సయ్తాను నాసనం ఆజినిక

7 వెయిజ్ పంటేజ్ పూర్తి ఆతి వెనుక సయ్తాను తొహె ఆతిబాణిజ్ డిస్తె ఆనాన్.

8 వాండ్రు బూమి ముస్కు నాల్గి దిక్కుజాణి విజు దేసెమ్కాణి లోకురిజ్ మొసెం కిజి, విదెం కిదెజ్ ఇజి గొప్ప పెరి సయ్యమ్దిజ్ గోగ్ని మాగోగ్ ఇనిబాన్ కూడుఃప్పి తనాన్లె. వరి లెక్క సమ్దరం పడఃకాది ఇస్కలెకెండ్ మంజినాద్.

9 వారు బూమి ముస్కు మన్ని విజు దేసెమ్కాజ్ సాహార్. దేవుణు లోకుర్ మంద కూడఃజిమంజిని, దేవుణు గొప్పజ ఇస్టం కిజిని పట్టుమ్దిజ్ సుటులం ఆతార్, గాని పరలోకమ్దాన్ సిసు డిఃగిజి వాజి వరిజ్ సుర్దాద్.

10 వరిజ్ మొసెం కిత్తికానాతి సయ్యూన్ గందకమ్దాన్ కసిని సిసు మంజిని బాడ్డిదు అర్పె ఆతాన్. అబ్బె అయ క్రూరమతి జంతుని అబద్దం వెప్పొ వన్ని ప్రవక్త మనార్. అబ్బె వారు రెయుపోగోల్ డిఃన్ ఏండ ఎలాకాలం హిమ్సెజ్ కిబె ఆజి మంజినార్.

సాతికార్ తీర్పు పొందిజినార్.

11 నస్తివలె, గొప్ప తెల్లాజ్ మన్ని ఉండ్రీ పెరి సింహాసనమ్ని దన్ని ముస్కు ఒరెన్ బస్తిమన్నికబా నాను సుడఃత. బూమిని ఆగసం వన్ని ఎద్దుహాన్ ఉహ్కీ సాహి లెకెండ్ సిల్లెండ ఆతె. అక్కెజ్ తోవీండాతె.

12-13 మరి సాతికార్ విజేరె, అహిజ పెరికార్ని ఇజిరికార్ విజేరె అయ గొప్పపెరి సింహాసనం ఎద్దు నిహిమన్నిక సుడఃత. సమ్దరమ్దు సాతికార్ విజేరె సవ్వరమ్దాన్ డిఃస్సె ఆతార్. సాతికార్ మంజిని అయా లోకమ్దు మహికార్బా డిఃస్సె ఆతార్. నస్తివలె, పుస్తకమ్కు రెకె ఆతె. దేవుణు వెట ఎలాకాలం బత్కిని వరి పేరుకు రాసి ఇడఃజిని మరి ఉండ్రీ పుస్తకమ్బా రెకె ఆతాద్. అయ పుస్తకమ్కాజ్ రాస్తి ఇడ్డిమన్నిలెకెండ్, ఒరెన్ ఒరెన్ కితిమన్ని పణిజ తగితి లెకెండ్ సాతికార్ తీర్పు పొందితార్.

14 సావుని అయా లోకం గందకమ్దాన్ సిసు కసి మంజిని సెరు నన్ని బాడ్డిదు అర్పె ఆతె. యా సిసు మంజిని బాడ్డి రుండి సావు.

15 దేవుణు వెట ఎలాకాలం బత్కిని వరి పేరుకు రాసి ఇడఃజిని పుస్తకమ్దు పేరు తోర్ ఏండాతిజ ఎయెన్బా అయ సిసు మంజిని బాడ్డిదు అర్పె ఆనాన్లె.

21

కొత్త యెరూసలేం

1 నస్తవలె, నాను ఉండ్రీ కొత్త ఆగాసమ్ని ఉండ్రీ కొత్త బూమి సుడత. మొదోహి ఆగసమ్ని మొదోహి బూమి సిల్లెండ ఆతె మహా. సమ్దరమ్బా సిల్లెండ ఆత మహాద్.

2 మరి కొత్త యెరూసలేము ఇని దేవుణు పట్టుం, మాసి సొండ్రేజ్ ఇజి విజు ఇట్కేజి గొప్ప నెగండ తయారాతిమన్ని పెండ్లి దక్షడిలెకెండ, పరలోకమ్దాన్ డిగ్జి వాతిక నాను సుడత.

3 నస్తవలె, “ఇదిలో, దేవుణు లోకుర్ వెట బత్కిని ఇల్లు మనాద్. వాండ్రు, వరి వెటనె బత్కినాన్. వారు వన్ని లోకుర్ ఆన మంజినార్. దేవుణు వన్నిజ్ వాండ్రె ఆజి వరివెట మంజి వరి దేవుణు ఆన మంజినాన్.

4 వాండ్రు వరి కణుకెజాణ్ కణిర్ తేల్వాన్. మరి సావు, దుకం, అడఃబానిక, నొప్పిజ్ ఎసెజ్బా మన్ఉ. ఎందానిజ్ ఇహిజు మొదోహి సజతిజ్ విజు గడఃస్తె సాహె”, ఇజి అయ సింహాసనమ్దాన్ ఉండ్రీ పెరి కంటం వెహిక వెహ.

5 అయ సిమసనమ్దు బస్తి మన్నికాన్, “ఇదిలో నాను విజు కొత్తాకెజ్ కిజిన”, ఇజి వెహాన్. మరి “యా మాటెజ్ నమ్మిదెజ్ అట్టికెజ్ని నిజమాతికెజ్. అందెజె ఇక్కెజ్ రాసి ఇడఃఅ”, ఇజి వాండ్రు నజి వెహాన్.

6 మరి నావెట వాండ్రు ఈహు వెహాన్. “విజు పూర్తి ఆతె. అల్పాని ఒమెగ నానె. మొదోల్ని ఆక్కర్ నానె. ఏహ్కా కట్టివన్నిజ్, పాణం సీని ఏరు వాని ఊటదాన్, వన్నిజ్ ఉండెజ్ ఏరు, నాను సెడ్డినె సీనా.

7 సెఇవనకాజ్ ముస్కు గెలిస్సికాన్ వినుకాజ్ విజు అక్కు మన్నికాన్ ఆనాన్. నాను వన్నిజ్ దేవుణు ఆన మంజినాన్. వాండ్రు నజి మరిన్ ఆన మంజినాన్.

8 గాని పహ్కీదికార్, దేవుణు ముస్సు నమకం సిల్లికార్, సెఇ పణిజ్ కినికార్, లోకురిజ్ సప్పికార్, రంకు బూలానికార్, గార్డి కినికార్, బొమ్మెజ మాడిఃస్సికార్, విజు రకమ్ది అబద్దం వర్గినికార్, నిన్నికార్ విజేరె గందకమ్దాన్ సిసు కసిని సెరు నన్ని బాడ్డిదు అర్పె ఆనార్. అక్క వరి వంతు. యాకదె రుండి సావు.

9 నస్తివలె, కడెవెరిది జబ్బుజాణిజ్ నిండ్రితి మన్ని ఏడు కుడుకెజ్ అస్తిమన్ని ఏడు దేవుణుదూతార్లోఇ ఒరెన్ వాజి, “ఇబ్బె రఅ. గొరెపిల్ల అల్లి ఆతి పెండ్లి దజ్డిడిదిజ్ నిజి తోరిన్న”, ఇజి నజి వెహ్హాన్.

10 దేవుణుఅత్తుదాన్ నిండ్రితి మన్ని నజి, వాండ్లు గొప్ప ఎత్తు మన్ని ఉండ్రి పెరి గొరొన్ ముస్సు ఒతాండ్రె, యెరూసలేము ఇని దేవుణు పట్టుం, పరలోకమ్దాన్ దేవుణుబాణిజ్ డిఃగిజి వాజినిక తోరిస్తాన్.

11 అయ పట్టుం, దేవుణు జాయ్దాన్, దగదగ మెరిసిమంజిని జాయ్ మన్ని సూర్య కాంతం ఇని పేరు మన్ని ఎరాని జాయ్ మంజిని గొప్ప విలువాతి రంగు పణకుది జాయ్లెకెండెని, గటిమన్ని గాజు లెకెండె మహాద్.

12 అయ పట్టుమ్దిజ్ గొప్ప ఎత్తు మన్ని గోడఃని, మరి అయ గోడఃదిజ్ పన్నెండు దారబంద్రమ్కు మహె. అయ దారబంద్రమ్కాజ్ పన్నెండు దేవుణు దూతార్ మహార్. దారబంద్రమ్కాజ్ ఇస్రాయేలుది పన్నెండు తెగెజి పేరుకు రాసి ఆతె మహె.

13 తూర్పు దరిజ్ మూండ్రి దారబంద్రమ్కుని ఉత్తరదరిజ్ మూండ్రి దారబంద్రమ్కుని దనిణదరిజ్ మూండ్రి దారబంద్రమ్కుని పడమాట దరిజ్ మూండ్రి దారబంద్రమ్కు మహె.

14 అయ పట్టుమ్ది గోడఃదిజ్ పన్నెండు పునాదిజ్ మహె. అయ పన్నెండు పునాదిజి ముస్సు గొరెపిల్ల అపొస్తురు ఆతి పన్నెండు మణిసిరి పేరుకు తోర్జి మహె.

15 అయ పట్టుమ్దిజ్ని, దన్ని గోడఃజ్ని దారబంద్రమ్కు కొలిదెజ్, నావెట వర్గిని దేవుణు దూత కియుదు బజారమ్దాన్ తయార్

కితిమన్ని ఉండ్రీ కొలిని డుడ్డు మహాద్.

16 అయ పట్నం నాల్గి దరిజ్ ఉండ్రె లెకెండ్ కొల్ల మన్నిక. దన్ని నిరిండ్, దన్ని వెడల్పు సమానం మహె. వాండ్రు అయ కొలిని డుడ్డుదాన్ అయ పట్నమ్దిజ్ కొలిత్తిజ్, దన్ని కొల్ల రుండి వెయుజ్ నాల్గి వందెజ్ కిలోమీటరుజ్ ఆతె. దన్ని నిరిండ్, ఎత్తు, వెడల్పు విజు సమానం మహె.

17 వాండ్రు దన్ని గోడెజు కొలిత్తిజ్, అది లోకురి కొల్లదిజ్ వంద నాల్వయ్ నాల్గి మూరెజ్ దలం మనాద్. అయ కొల్లదానె దేవుణు దూత కొలిత్తాన్.

18 దన్ని గోడ్డె, సూర్య కాంతం ఇని పేరు మన్ని ఎరాని జాయ్ మన్ని విలువతి రంగు పణకుజాణిజ్ తొహ్తా మనాద్. మరి అయ పట్నం గాజు లెకెండ్ మన్ని మెర్నిని బజారమ్దాన్ తయార్ ఆత మనాద్.

19 అయ పట్నమ్ది గోడెజు పునాది రకరకమ్ది గొప్ప విలువతి రంగు పణకుజాణిజ్ సోకుదాన్ తయార్ ఆత మనాద్. మొద్దొహి పునాది సూర్య కాంతం ఇని ఎరాని రంగు పణకు, రుండి పునాది నీలి రంగు పణకు, మూండ్రీ పునాది జమున రంగు పణకు, నాల్గి పునాది ఆకు రంగు పణకు.

20 అయ్దు పునాది వయ్డుర్యం ఇని రంగు పణకు, ఆరు పునాది కెంపు ఇని రంగు పణకు, ఏడు పునాది బజారం రంగు పణకు, ఎనిమిది పునాది గోమెదికం ఇని రంగు పణకు, తొమ్మిది పునాది పున్యరాగం ఇని రంగు పణకు, పది పునాది సొర్లసూనియం ఇని రంగు పణకు, పదకొండు పునాది పద్మరాగం ఇని రంగుపణకు, పన్నెండు పునాది సుగందం ఇని రంగు పణకాణిజ్ కిత్త మనాద్

21 దన్ని పన్నెండు దారబంద్రమ్కు పన్నెండు ముజెలుజాణిజ్ కిత్త మనాద్. ఉండ్రీ ఉండ్రీ దారబంద్రం ఉండ్రె పూసదానె కిత్త మనాద్. పట్నమ్ది రోడుజ్ అడ్డి మన్నికెజ్ తోరిజని గాజుదిజ్ పోలితి బజారమ్దాన్ తయార్ ఆత మనాద్.

22 విజు దన్నిజ్ అతికారం మన్ని ప్రబు ఆతి దేవుణుని గొరెపిల్ల దన్ని దేవుణు గుడిః ఆతిమన్నిజ్ అయ పట్నమ్ లోఇ దేవుణు గుడిః

ఉండ్రిబా తోర్వితాద్.

23 అయ పట్టుమ్దిజ్ జాయ్ సీదెజ్ ఇజి పొద్దుబా నెలబా అక్కర్ సిల్లెద్. ఎందానిజ్ ఇహిజ, దేవుణు గొప్ప జాయ్నె పట్టుం విజు జాయ్ సీజి మహాద్. గొర్రెపిల్ల దన్నిజ్ దీవలెకెండ్ మహాద్.

24 విజు దేసెమ్కాణి లోకుర్ అయ జాయ్దు నడిఃనార్, బూమి ముస్సు మన్ని రాజుర్, వరిజ్ కల్గితిమన్ని విజు గవరమ్ని ఆస్తి అయ పట్టుమ్ లొఇ తనార్.

25 అబ్బె రెయు సిల్లెండ, జాయ్నె మన్నిజ్ ఎసెజ్బా అయ పట్టుమ్ది దారబంద్రమ్కు కెహావద్.

26 విజు దేసెమ్కాణికార్ వరి ఆస్తిజ్ని వరిజ్ గవరం తప్పికిజ్ విజు అయ పట్టుమ్ లొఇ తనార్.

27 దేవుణు వెట ఎలాకాలం బత్కిని వరి పేరుకు రాసి ఇడఃజిని గొర్రెపిల్లాది పుస్తకమ్దు పేరుకు మన్నికారె, దన్ని లొఇ సొనార్. గాని సెఇ పణిజ్ కినికార్, మొసెం కినికార్, సిగు ఆనికెజ్ కినికార్ ఎయెర్బా దన్ని లొఇ సొండ్రెజ్ అట్వర్.

22

పాణం సీని గడ్డ

1 నస్తివలె, కల్తిసిల్లి అద్దం నన్ని, పాణం సీని ఏరు మన్ని గడ్డ, దేవుణుదిని గొర్రెపిల్లది సింహాసనమ్దాన్ సొన్ని మంజినిక అయ దేవుణు దూత నజి తోరిస్తాన్.

2 అయ గడ్డ పట్టుమ్ది రోడు నడిఃమిహాన్ సొన్ని మహాద్. అయ పెరి గడ్డాది రుండి ఒడ్డుజ పన్నెండు నెలెజ, పన్నెండు సుట్టు కాయెజ్ కాని పట్టు సీని పాణం సీని మరాన్ మనాద్. అయ పాణం సీని మరాతి ఆకుజ్ విజు జాతిజణి వరిజ్ జబ్బుజాణిజ్ నెగెండ్ ఆదెజ్ పణి కినాద్.

3 దేవుణు సయివ్ సిత్తి మహికెజ్ ఇనికబా అయ పట్టుమ్దు మన్వద్. దేవుణుదిని గొర్రెపిల్లది సింహాసనం అబ్బె మంజినాద్. వన్ని పణికినికార్ వన్నిజ్ పొగడిఃజి మాడిఃసి మంజినార్.

4 వారు దేవుణు ఎదురు మంజి. మొకొం నింఱు వన్నిజ్ సుడఁజి మంజినార్. వన్ని పేరు వరి నొఱుజ రాసె ఆనాద్లె.

5 అబ్బె ఎనెజ్బా రెయు మన్ ఏద్. దీవ జాయ్ గాని షొఱ్డు జాయ్ గాని వరిజ్ అక్కర్ సిల్లెద్. ఎందానిజ్ ఇహిజ, ప్రబు ఆతి దేవుణునె వరిజ్ జాయ్ సీజి మంజినాన్. వారు అంతుసిల్లెండ ఎలాకాలం ఏలుబడిః కిజి మంజినార్.

6 మరి అయ దేవుణు దూత, నజీ యాలెకెండ వెహ్లాన్. “యా మాటెజ్ నమ్మిదెజ్ తగ్గికెజ్ని నిజమాతికెజ్. ఎందానిజ్ ఇహిజ ఇనికెజ్ వెహ్లాజ్ ఇజి వన్ని ప్రవక్తరిజ్ వెహ్లాని దేవుణు, బేగి జర్గిదెజ్ మన్ని వనకాజ్ వన్నిజ్ సందితివరిజ్ తోరిస్తెజ్ ఇజి వన్ని దూతెజ్ షోక్లాన్.

యేసు మర్జి వాజినాన్.

7 “ఇదిలో నాను బేగినె వాజిన. యా పుస్తకమ్దు మన్ని, దేవుణుబాణిజ్ వాతి మాటెజ్, వెంజి, లోజిజి, నడిఁనికాన్ దేవుణు సీని దీవెనమ్కు మంజినికాన్ ఆనాన్”.

8 యోహాను ఇని నాను, యా సజతిజ్ వెహ మన్ను, సుడఁత మన్ను. నాను యాకెజ్ వెంజి వెనుక, యాకెజ్ నజీ తోరిసిని వన్నిజ్ షొగిడిఁజి మాడిఁస్తెజ్ ఇజి అయ దూత పాదమ్కాజ్ పడఁగ్జి అర్ల.

9 గాని వాంఱు, “షొని, సీను యాలెకెండ కిమా. నాను, సీవెటని, ప్రవక్తరు ఆతి నీ తంబెరిజవెటని, యా పుస్తకమ్దు మన్ని మాటెజ్ లోజిజి నడిఁనివరివెట కుడిఁజి పణికినికానె. దేవుణుదిజె షొగిడిఁజి మాడిఁన్అ”, ఇజి నజీ వెహ్లాన్.

10 మరి నావెట ఈహు వెహ్లాన్. “యా పుస్తకమ్దు మన్ని మాటెజ్ దేవుణు వెహ్లాకెజ్, అందెజె దిన్నిజ్ మూక్సి సీలు కిదెజ్ ఆఎద్. ఎందానిజ్ ఇహిజ యాకెజ్ విజు జర్గిదెజ్ కాలం డగ్గు ఆత మనాద్.

11 తప్పు పణిజ్ కినికాన్ మరి ఒదె తప్పు పణిజ్ కిపిన్. ఎయెన్బా కెలార్ బూలానికాన్ మరి కెలార్ బూలాజి మనీన్. సీతి మన్నికెజ్

కినికాన్ మరి ఒద్దె నీతి మనికెజ్ కిపిన్. దేవుణు వందిజ్ కేట ఆతికాన్, మరి అయాలెకెండ్ దేవుణు వందిజ్ కేట ఆజి మనీన్”.

12 “ఇదిలో, నాను బేగినె వాజిన. నాను వానివలె ఒరెన్ ఒరెన్ వన్నిజ్, వాండ్రు కితి పణిదిజ్ తగితి లెకెండ్ సీదెజ్ ఇనాయం తనా.

13 అల్పాని ఒమెగ నానె. మొదొహి - కాన్ని కడెఃవెరిదికాన్ నానె. మొదొల్ని ఆకార్ నానె.

14 పాణం సీని మరాతి పట్కు తిండ్రెజ్ అక్కు మన్నికారాజి దారబంద్రమ్కాణిజ్ అయ పట్టమ్ లొఇ సొండ్రెజ్ వరి సొక్కెజ్ నొర్బానికార్ దేవుణు సీని దీవెనమ్కు మంజినికార్ ఆనార్.

15 నుకుడిఃజ్ని మత్రిసినికార్, రంకు బూలానికార్, లోకురిజ్ సప్పికార్, బొమ్మెజ మాడిఃస్నికార్, అబద్దమ్దిజ్ ప్రేమిసి అయాలెకెండ్ కిజి మంజినికార్ విజేరె వెల్లి మంజినార్.

16 దేవుణు సజమ్కాజ్ మన్నివరివందిజ్, యా సజతిజ వందిజ్ సాస్యం వెహైజ్ యేసు ఇని నాను, నా దూతెజ్ పొక్త మన్న. నాను దావీదువెలెదాన్ సొత్తి సిగ్గుని వన్ని తెగాదు పుట్టికాన్. కోడిఃజామ్దు సొని గొప్ప జాయ్ మన్ని సుక ఆత మన్న”.

17 మరి దేవుణు ఆత్మని పెండ్లి దజ్డిః, “రఅ”, ఇజి వెహ్సినార్. యాక వినికాన్బా “రఅ” ఇజి వెహైజ్వలె. ఎయెన్బా ఏహ్కా కట్టిజ వాండ్రు రపిన్. ఎయెన్బా వాండ్రు కోరిత్తిలెకెండ్, పాణం సీని ఏరు ఇని ఇనాయం సెడ్డిఃనె లొసిన్.

18 యా పుస్తకమ్దు మన్ని దేవుణు ప్రవక్త వెహ్తి మాటెజ్ వెనివరిజ్ విజేరిజ్, వారు జాగర్త మండ్రెజ్ ఇజి నాను వెహ్సినిక ఇనిక ఇహిజ, ఎయెన్బా దిన్నివెట మరి ఇనికబా కూడుఃప్పిజ యా పుస్తకమ్దు రాస్తీమని జబ్బుజ్ విజు, దేవుణు వన్ని ముస్సు తపిస్వాన్.

19 ఎయెన్బా యా పుస్తకమ్దు మన్ని దేవుణు ప్రవక్త వెహ్తా మాటెజ, ఇనికబా లాగితిజ, వన్నిజ్ దేవుణు యా పుస్తకమ్దు వెహ్తామని పాణం సీని మరాతి పట్కు తిండ్రెజ్ అక్కు సిల్లికాన్ లెకెండ్ కినాన్. నెగ్గి పట్టుమ్దు వంతు మన్ఇకాన్ లెకెండ్ కినాన్.

20 యా సజతిజ వందిజ్ సాస్యం వెహ్తాకాన్, “నిజమె నాను బేగినె వాజిన”, ఇజి వెహ్తానాన్. ఆమెన్. ప్రబు ఆతి యేసు రఅ.

21 ప్రబు ఆతి యేసు దయాదర్శం దేవుణులోకుర్ విజెరె వెట మనీద్. ఆమెన్.

Konda: కొండ బాసడు నెగ్గి కబ్బు
Konda Dora New Testament which was published in
2006

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files
dated 7 May 2025

840896da-3a66-5e43-9018-4a95a349d60c